

6244
132

治道
法祖

歷代名臣奏議

卷六十八
之七十

歷代名臣奏議卷之六十八

治道

元成宗時鄭介夫上奏曰。切謂釋道之教。與夫子之道並立為三。不知釋道之所謂教者何事。昔棄君親。毀滅綱常。捨本逐末。以此教人可乎。明知其非而趨從愈廣。蓋闢之者不針其病。彼得以有辭。謂世間無佛無仙不可也。誠有之一言以蔽之曰無用耳。於國無益於人無濟。雖宗而事之。將焉用之。夫聖人之道不可一日無。三綱五常之理不可一日缺。百姓恃此以自存。無此則不能以一朝居。雖無佛可也。無仙亦可也。况彼二者之說。不過竊聖道之緒餘耳。夫子之所不屑為。彼方挾此以自高。夫子豈不知佛之為佛。仙之為仙。以其不切於日用常行。故未始言之。昧者反謂佛能超世。夫子不能免於世。佛為上一截事。夫子為下一截事。故夫子之不及佛也。噫。為是說者。愚

亦甚矣。殊不知夫子正是上截事。佛乃下截事耳。李路問事鬼神。子曰。未能事人。焉能事鬼。敢問死。曰。未知生。焉知死。此一章乃三教是非之所由分也。謂佛超世者。以其入聖而不淪於鬼趣。長生而不與俗同腐也。謂聖人不免於世者。以其猶未能脫然於鬼與死也。其言固高矣。不思天下百萬億蒼生。豈能盡為佛。盡為仙乎。能超世者。寧幾何人。泝古及今。或得一於千百中。或閱數世而不得一焉。正自不能免於世也。三綱淪而九法斁。禮樂崩而陰陽隔。人之類滅久矣。安得有所謂佛與仙邪。夫子所以不言者。蓋為世道深長思也。君臣父子。夫婦人之大倫。人稟天地之靈以生。幼學壯行。期為世用於人之道。未能了。何暇問鬼。於生之理。未能知。何暇問死。能無忝於為人。能無負於此生。然後反而求之。可以免輪迴致不死耳。非佛與仙為下截事乎。况今之奉佛求仙者。逐風吹影。懵不知佛與仙謂何。祖風

法門云何。如達磨面壁九年。維摩不二法門。止為身計。何嘗施禍福於人。亦未嘗要人之敬奉。後人為之莊嚴懺誦。扇惑愚民。非佛之真性也。張道陵遠處深山。薩真人一瓢自隨。厭與俗接。何曾妄有希求於人。人亦不敢輕有所與。後來設立符籙醮禳。誑取錢物。非祖師之初意也。今見披禪衣者。便拜為佛。見戴黃冠者。即稽為仙。彼自身尚不克保。何能及人。乃欲賴之以祝聖躬之壽考。祈國祚之長。黎庶之安樂。非大愚而何。往年留都下。見帝師之死。馳驛取小師來代。不過一尋常庸庸耳。舉朝上下。傾城老弱郊迎。望風頂禮。羅拜道旁。不知所敬者何。所慕者何。其愚一至於此哉。力排其非。反招恚怒。指為毀佛謗道。幾若漆沐不可解者。今以出於祖師之口者解之。則可釋然矣。昔達磨自南天竺來。梁武帝詔至金陵。問曰。朕造寺捨經度生。不可勝紀。有何功德。師曰。並無功德。此但天人小果。有漏之因。

如影隨形。雖有非實。此語足以解求福田利益者之惑。陳搏隱華山。宋太宗召至闕下。延入宮中。與語。使宰相宋琪等問曰。先生得玄默。修養之道。可以授人乎。對曰。練養有術。縱使白日升天。何益於治。今聖上洞達古今。深究治亂。正是君臣合德致治之時。勤行修練。無以加此。琪等表上其語。上喜其斯言。可為求神仙者之鑒。愚冥之徒。不知取法於此。輒取其無稽之論。公卿士庶。合情勤奉。稍有怠慢。懼禍目前。隨所愛欲。無不聽從。胡不思此輩妖妄。上不足以裨國政。下不足以熙群生。中不足以潤身屋。竭有用之財。事此無用之物。吾不知其何心。尚論其祖風法門。數椽以庇風雨。榻外視猶傳舍。何假乎廣厦千間。琉璃萬瓦。一鉢以供晨夕。身外皆為長物。何資乎千倉萬箱。前騶後從。今天下大寺觀租入鉅萬。徒衆千百。饗用過於宮禁。積蓄俸於邦賦。為長老觀主者。營求而得之。椽題華麗。珍具畢陳。擁妓宴

飲。連宵浹旦。佃客火工。男女雜襲。蠹政侵民。無所不至。經理營運。結納官府。不異於庶姓人家。教門至此。掃地盡矣。若不少抑。為禍滋深。始有不可勝言者。唐會昌間。為僧尼耗蠹天下。命併省佛寺。上都東都各留二寺。上州留一寺。中下州並廢。分為三等。上等留僧二十人。中等十人。下等五人。餘僧及尼皆勒歸俗。通毀招提蘭若。四萬餘區。收良田數千萬頃。奴婢十五萬人。歸俗僧尼二十六萬五百人。真是快活條貫。宜體此意。先將西番大師留京都者。以禮敦遣。悉令還國。外而天下寺觀錢糧。尚使輸官。其游手惰農之夫。蠶食常住。無異俗人。各令歸農務本。如果有德行真修。茹枯絕慾之士。雖無補於世用。然息念離塵。亦有可取。但官給日米二升。料錢二貫。歲絹五疋。許置從二名。以供使令。每名日米二升。歲布二疋。如此待之。亦云足矣。或果有真佛出現。當如韓文公所云。容而接之。禮賓一設。賜衣一襲。

衛而出之於境。不令惑衆也。若夫神仙潛形遁跡。不輕於降臨塵間。人亦不得而見之。使可見可接。則非仙矣。然舉此甚難。悟此甚寡。知之者衆。罕不可破。非有高明特達之見。洞察其理。深明其妄。不足以語此。惟聖朝其採擇焉。

介夫又論邊遠狀曰。邊遠之任。至甚不輕。古王者之遣將也。跪而拜。較曰。間以內寡人制之。間以外將軍制之。故邊將咸得以便。且從事。朝廷不得而專之。無他。謂其諳於風土。習於形勢。又知其人之可用與否。以之臨事。如身之使臂。臂之使指。莫不順意。若待朝廷。選官分任。無非執袴膏梁之子。刀筆筐篋之吏。不習兵事。不歷艱難。到彼無所用焉。故昔者邊鄙用人。每歲給降空頭宣敕。令帥臣就便補擬。類名申奏而已。以其所用之人。出乎常調之外。非持文墨議論者。所可測其短長之命也。且就安避危人之常情。萬里之遠。煙瘴之區。在常

選中者。必不肯往。黃石公軍勢曰。使智使勇。使貪使愚。使智者樂立其功。勇者好行其志。貪者急趨其利。愚者不計其死。若非至貪與至愚。誰肯離妻子。去墳墓。置身於必死之地。其有輕生好名之人。激節赴義之士。不顧父母之遺軀。求陞數級之資品。朝廷亦何吝一紙虛名。以勉勵之。然今日未嘗無邊遠選。固有准保定奪者矣。但保舉之初。欠於立法防奸。區用之後。失於計功覈實耳。如雲南甘肅八番兩江等處。統帥藩臣。一赴關下。便行保人。就於京都。旋捏前資。以所保之品。絕定價例之重輕。多者百錠。少者亦三之二。或盡數納足。或先與一半。或立利錢文書。呈解到省。官可立得。以此淹困仕人。街市富子。每聞一帥臣至。則爭先求之。並未嘗涉歷塞庭。練習邊事也。處於養養者。不吝資財。苟圖根脚。又為改仕之謀。出於微賤者。僥倖榮名。欣然勇往。何濟緩急之用。近兩江元帥黃晉刺。不花累保得除者。幾

及百數。續明里馬合麻元帥蹈其故轍。公然責保。聲跡頗張。甚為不雅。今有劉八都兒平章在都。而投門下求保舉者。又將紛然而至矣。遂致邊鄙失得才之實。朝廷負濫爵之名。皆諸帥不忠誤國之過也。更有甚於此者。今八方按堵烽燧不驚。正無事於窮征遠討。但務安集故地足可矣。往者劉鄭二帥安開邊釁。以致雲南小有不安。尺地皆祖宗之遺業。一民皆祖宗之赤子。不宜置之度外。如八百媳婦之國。素不沾化。縱令盡有其土地人民。初無益於聖朝之萬一。生事之臣。但知可以要功希賞。不知有損於國家甚大也。且外夷小醜。何足芥蒂。服不能為國之榮。叛不能為國之辱。得之不足以加國之富。失之不足以致國之貧。故古聖人以不治治之。不計其去就也。昔傅介子以偏使斬樓蘭王。鄭吉以騎都尉發諸國兵破車師。降日逐。威振西域。馮奉世因使大宛。矯制擊莎車。車諸國。凡此者。皆未嘗出於朝

廷之命也。不假乎遣將調兵無煩於運輸供給。用得其人。則自能集事。若待稟命而行。整堂堂之陣。出師數萬里之遠。驅不安水土之弱兵羸卒。而投之不毛之地。虎狼之口。且其將亡兵喪。外損國體。內傷國用。蓋必致之理也。今後遠方之事。一切委任邊將。借以予奪。燕陲之權。責以內守。外攻之效。聽其擇人。而使伺隙而動。可以進則擊。不可以進則守。其有赴闕朝現者。乃臣子之彝禮。慰諭勤渠。賜宴增級足矣。不許在都。以白呈濫保。凡有合用之人。並從本處公舉。完簽轉申移咨都省。隨其所擬職名。即與准給宣敕。若不由各省咨來者。別無定奪。則帥臣不得以容其奸矣。既除之後。考覈真偽。有已受不任而借徑他求。或已在不職。而耽誤官事。並須罪及本人。罰及保官。則求仕者。揆已無能。自不安求。保舉者。量才無取。必不輕保。而邊境獲真才之用矣。果能如傅介子輩卓有所立。不資朝廷毫駭之費。而遠

拓疆土之廣則優加旌賞以示激勸此用人之微機安邊之要道善謀國者之長策也

介夫又論抑強狀曰漢書所稱游俠即今之豪霸也其時貴臣知實嬰田蚡之屬競逐於京師布衣如劇孟郭解之徒馳騫於閭閻立氣勢作威福結私交連黨類權行州域力折公卿凡此者皆亂之所由生也豪俠之輩代不能絕世降俗末流弊滋甚古之豪霸猶能賑窮周急謙退不伐色取仁以合時好立虛譽以要權利今之豪霸所謂禦人於國門之外者真生民之蠹國家之賊也然有席祖父之勢者有挾富強之資者其下則有經斷官吏閑廢於家務為廢皮無賴者人雖不等均之為蠹為賊耳憑震主之威執予奪之柄死可使活生可使殺富可使貧賤可使貴此在朝之豪霸也氣燄同室吞聲莫撓威凌胥吏奉令惟謹借公道以縱賄賂營私財以奪民利此在官之

豪霸也布置爪牙把握官府小民畏奉餽遺填門其孽產視為已物其妻子伴同奴婢此在鄉之豪霸也地雖不同亦均之為蠹為賊耳然在鄉者雖為豪霸之公磨而禍及於百姓則甚大也且即在下而小者言之凡有詞訟必須經手若不稟白而徑陳之有司者則設穿尋隙陷之於刑既已歸命於已而官吏有不順從者則別生事端索贓誣告其蓋粉可立而待也威勢既成動皆如意村落居民事之如父母敬之如神明郡縣守宰順指氣使俯首聽命而已間有一二剛方自立奮然出為寬民施一援手僅能抑之一時被罪還家之後故態依然真是法制所不能及禮義所不能移朝廷便民之事亦甚不少微有一利舉入豪家而細民何嘗得沾濡沫之惠使養政不能下逮者盡此輩有以阻之也由此推其大者為患何可勝言如朱張二家一賒死之盜賊耳以言豪霸則渠魁也皆向來朝廷寵遇之太過

所以養成今日之餘殃。原其始然。抑之不早。遂至身遭顯戮。禍及宰
臣。此眼前之轍跡也。昔漢主父偃說武帝曰。天下豪傑兼并之家。亂
衆之民。皆可徙茂陵。內實京師。外銷奸猾。所謂不誅而害除。武帝從
之。徙郡國豪傑及訾三百萬以上于茂陵。誠抑強扶弱之良法也。今
後若有醜惡聞於鄉邑。聲跡播於中外。不必加以刑辟。但限以訾計。
若干即遷之他郡。或徙之荒壤。視所犯之重輕。以定地之遠近。有訾
不及者。則移於附近。以五百里為限。祗帶既搖。枝黨自散。使良善咸
獲安存。官府亦易振立。彼得以全軀保家。朝廷亦不至於多戮少恩。
去豪霸之策。無以加此矣。又曰。隆古無豪霸之名。自秦廢井田而兼
并起。於是強者日富。弱者日貧。豪霸日興。殆不可遏。蓋強必凌弱。富
必欺貧。貧弱不能與競。遂歸心服命於富強之家。理勢然耳。聖朝開
國以來。郵民憂禁治豪霸。制令甚嚴。終莫能少戢其風。今上而府

縣。下而鄉。隨處有之。小大不侔。而蠹民則一。蜂起水湧。誅之不可
勝誅。雖有智者。莫如之何。愚嘗日夜思之。不究其源。徒窒其流。未易
以制也。制之之道。惟有井田一法。今不可得而行矣。蓋自古天下之
田。無不屬官。民不得而私有之。但強者力多。能兼衆人之利。以為富。
而無力者。不能自耕。其所有之田。至於轉徙流蕩。先王授田。使貧富
強弱。無以相過。各有其田。得以自耕。故天下無甚富甚貧之民。至成
周時。其法大備。畫地為井。八鳩五規。二牧九夫。以等其高下。溝洫
澮。川涂。畛。徑。以立其堤防。疆井既定。無得侵奪。雖欲貪井。不可得也。
商鞅用秦法。則寢死。已不復有井田之舊。於是開阡陌。阡陌既開。乃
有豪強兼并之患。富者田連阡陌。而貧者無置錡之地。然猶不明說
田在民也。官不得治。而民得自占為業耳。迄于漢亡。三國並立。兵火
之餘。人稀土曠。當時天下之田。既不在官。亦終不在民。以為在官。則

官無人收管。以為在民。則又無簿籍契券。但隨其力之所能至而耕之。元魏行均田。稍亦近古。唐因元魏而損益之。為法雖善。然令民得賣其二分。永業始有契約文券。日漸一日。公田盡變為私田。先王之法。由是大壞。天下紛紛。互相吞并。而井田永不可復矣。民得自有其田。而公賣之。官安得而禁制之。田既屬民。乃欲奪富者之田。以與無田之民。禍亂群興。必然之理也。董仲舒在武帝朝。此時去古未遠。井田之法。尚可追也。乃曰。井田雖難卒行。宜少近古。限民名田。以贍不足。言甚善而未克行。至哀帝時。孔光何武曰。吏民名田無過三十頃。期盡三年。而犯者沒入官。時丁傳用事。董賢隆貴。未便於已。遂寢其行。夫三十頃之田。周民三十夫之田也。以一人而兼三十夫之田。亦已過矣。而期之三年。似太迫蹙。為今之計。宜勿強卒難禁止。惟有限田之法。可以制之。酌古准今。宜為定制。每一家無論門閥貴賤。人口多寡。並以田十頃為則。有十頃以上。至于千頃者。聽令分析。或與兄弟子姪姻黨。或立契典賣外。人但存十頃而止。或敗亡而所存不及十頃者。亦聽十頃以下。至于一畝者。許令增買。亦至十頃而止。寬以五年為限。如過限不依制。而田富如故者。除十頃外。並沒入官。然官不歸於公。仍將沒官田。召賣與貧民。所得田價。一半輸官。一半給主。彼富者亦甘心而無辭。不出十數年。而豪強不治而自無矣。此法不驚民。不動衆。不用井田之制。而獲井田之利。使周公復生。亦何以易此哉。然寺觀布滿天下。田業過於巨室。卒未能如會昌之併省廢毀。而僧道恃無差發。因而廣置田宅。侵奪民役。為禍不小。亦宜立限。分為三等。大寺觀不得過十頃。中止五頃。下存二頃。有過制者。依上沒官。亦是以少抑僧道之僭踰也。良法美意。無加於此。以數千年未全之規。一旦復見於今日。豈非超古之事業。太平之盛觀歟。惟慮左右之

官無人收管。以為在民。則又無簿籍契券。但隨其力之所能至而耕之。元魏行均田。稍亦近古。唐因元魏而損益之。為法雖善。然令民得賣其二分。永業始有契約文券。日漸一日。公田盡變為私田。先王之法。由是大壞。天下紛紛。互相吞并。而井田永不可復矣。民得自有其田。而公賣之。官安得而禁制之。田既屬民。乃欲奪富者之田。以與無田之民。禍亂群興。必然之理也。董仲舒在武帝朝。此時去古未遠。井田之法。尚可追也。乃曰。井田雖難卒行。宜少近古。限民名田。以贍不足。言甚善而未克行。至哀帝時。孔光何武曰。吏民名田無過三十頃。期盡三年。而犯者沒入官。時丁傳用事。董賢隆貴。未便於已。遂寢其行。夫三十頃之田。周民三十夫之田也。以一人而兼三十夫之田。亦已過矣。而期之三年。似太迫蹙。為今之計。宜勿強卒難禁止。惟有限田之法。可以制之。酌古准今。宜為定制。每一家無論門閥貴賤。人口多寡。並以田十頃為則。有十頃以上。至于千頃者。聽令分析。或與兄弟子姪姻黨。或立契典賣外。人但存十頃而止。或敗亡而所存不及十頃者。亦聽十頃以下。至于一畝者。許令增買。亦至十頃而止。寬以五年為限。如過限不依制。而田富如故者。除十頃外。並沒入官。然官不歸於公。仍將沒官田。召賣與貧民。所得田價。一半輸官。一半給主。彼富者亦甘心而無辭。不出十數年。而豪強不治而自無矣。此法不驚民。不動衆。不用井田之制。而獲井田之利。使周公復生。亦何以易此哉。然寺觀布滿天下。田業過於巨室。卒未能如會昌之併省廢毀。而僧道恃無差發。因而廣置田宅。侵奪民役。為禍不小。亦宜立限。分為三等。大寺觀不得過十頃。中止五頃。下存二頃。有過制者。依上沒官。亦是以少抑僧道之僭踰也。良法美意。無加於此。以數千年未全之規。一旦復見於今日。豈非超古之事業。太平之盛觀歟。惟慮左右之

臣如丁傳等。恐妨於己。百端阻當。有不得行。為必湏斷以決之。不問於讓。執而守之。克底于終。而後有所成也。惟聖朝其嘉納焉。

介夫又論閱武狀曰。取兵於民。最為近古。計戶簽軍。乃國家之良法。亡宗弛於軍政。用錢產軍。以有限之國儲。供無窮之戰役。遂至兵盡國亡。而不可救。此可簽之覆轍也。國家自專書大同之後。誠值武修文之時。既未尚文。又不事武。文武兩失。非計之得也。夫治不可恃。安不可偷。天命靡常。難保其長。如一日廟堂之上。習於安娛。轍門之中。恬於秦養。兵不知律。將不知兵。國不知將。一旦走檄傳警。以弱將冗兵。投之敵前。小出則小挫。大舉則大北。何異驅市人而置之死地耶。昔之為元帥。為萬戶。為千戶。鎮撫者。皆是披荆棘。冒矢石。身經百戰。萬死一生。然後報之。以此職名也。今子弟承。不為降貨。是不忘其父而惠及其子。固見朝廷之厚德。然承蔭者。則皆弱冠。乳臭之子。着

食便飯之外。他無能焉。忝賴世襲。膺異擢。若再有軍功。則以何爵賞之。夫兵凶器也。戰危地也。豈可使不歷事之小兒。以當一面之重任哉。兼向出於海放者。今皆無軍可管。虛擔宣敕牌面。子弟亦復承襲。尤為冗濫。可盡減併也。軍人自混一以來。久不知兵。習之善戰者。壯而老。老而死。所餘今無幾矣。都城之下。禁衛軍卒。每歲在替。應役修來。修往。互換代名。甫諳兵事。又復還家。盡皆游惰之夫。豈識戰為何事。外路鎮守者。不聞兵革。不習騎射。升斗之糧。不了供給。汲汲焉買賣謀生。為餬口贍家之計。况各處軍官頭目。不思分鎮軍戶。乃國家之士卒。而以該管軍人為拂己之丁夫。或令報役私門。或遣營運遠方。上失備禦之謀。下奪農商之利。雖名為軍。實與百姓等耳。似此之徒。使之臨敵制勝。惟有束手就擒。雖千百不足以當一二也。昔唐太宗引諸衛將卒習射於庭。諭之曰。邊境少安。則逸遊忘戰。是以寇

來美之能禦。今不使汝等穿池築苑。身習弓矢。居閑則為汝師。寇來則為汝將。於是人思自勵。數年之間。悉為精銳。夫穿築之事。自有民後。唐立租庸調法。每丁歲役二旬者。謂此耳。今後軍官子孫。宜擇有器識才力者。比民官承廕之例。稍優一等。待其久習戰事。顯立軍功。然後復之以祖父之職。軍戶宜黜其丁壯強悍者。永當官身。勿令交授。朝夕訓習騎射。優其衣糧。更立賞格。以激勵之。夫將不在多。兵不在衆。若訓練之精。蒐閱之勤。將為三勇。將兵皆勝兵。孰有當其鋒者。此事似緩而實急。長計遠慮者。所宜究心也。

介夫又論馬政。狀曰。古今立國。未嘗不怠於馬政。蓋以邊庭守戰之備。馬不可缺。而車輦出入。百官擁從。及一檄書交馳。郵傳迭發。尤不可一日無也。國朝開基以來。以牧放為俗。羊馬之群。遍滿谷野。生長草地。不假喂飼之勞。隨意所用。如取厩中。是以出兵行師。所向無前。皆資

馬之力也。近年偃武之餘。用馬日少。故於馬政。不復介心。古者給價。換馬已非長策。今乃刷馬民間。尤為弊政。且南北之風土不同。生長於南者。則不禁其冷。生長於北者。則不禁其熱。隨其土產之宜。而用之可也。若刷東南之馬。以供西北之用。則立見其死亡耳。又兼牧於野者。每於水草。習於馳驟。以之臨敵。易於鞭策。畜於私家者。飽以芻豆。勤於剪拂。一旦置之荒郊。便已瘦弱無力。况當矢石之衝。何濟於用。朝廷失於計畫。苟且目前。不循廣馬之成規。而行刷馬之下策。雖曰和買。何異白奪。且刷馬之政。出於亡金。其時隣敵交攻。疆土滋削。未免刷之民間。以應一時之急耳。堂堂天朝。不宜蹈覆亡國之遺轍也。兼刷至之馬。實無所用。而民間之怨。皆歸於國。甚非經久之計。今民間皆畏憚不敢養馬。延以歲月。民馬已稀。萬一國家急欲用馬。何從而得。宜及閑暇早為之謀可也。唐初得牝馬三千匹。徒之隴右。命

張萬歲掌之。蕃息至七十萬匹。分為八坊四十八監。各置使以領之。是時天下以一縑易一馬。及玄宗以王毛仲為內外閑廐使。東封之日。有馬四十三萬匹。牛羊稱是。此已然之明效也。今國家之地數倍於唐。水草美處。盡在版圖之中。擇宜牧之地。各設牧馬監官。給此馬。選用能吏。使專牧馬之權。重之以職任。優之以俸祿。責之以成效。不十數年。馬不可勝用矣。向來家自為牧。衣食之費。皆仰於此。取其餘而用之。猶且不竭。況今以全盛之國。又助之以官府之力。因其舊俗而行之。亦甚易事。何必以刷馬為政。徒結怨於民間也。

介夫又上疏曰。近觀朝廷庶政更新。慶開言路。愚嘗採摭二十餘事。陳之省臺。自謂言當乎理。事當乎情。可以少裨聖政之萬一。而乃視為迂疎不切之論。為沒常虛調之行。外示容納。內懷猜疑。展轉數月。竟成文具。古人謂忠言逆耳。先接。御良有以也。苟錄素餐。固可蒙

蔽。皇天后土。豈堪厚誣。未幾八月初六之夕。京師地震者三。市廛惻怛。莫知所為。越信宿而衛輝太原平陽等處。馳驛報聞者接踵。雖震有輕重。而同出一時。人民房舍。十損八九。震而且陷。前所罕聞。迄今動搖勢猶未止。亦可謂大異矣。春秋二百四十二年之間。災變迭出。而地震者纔五。國家自十數年矣。凡三見之。以今考古。未有若此之數數也。漢哀帝初。水出地震。李尋對曰。四方中央連國。歷州俱動者。其異最大。關東數震。未為大逆。近者之震。連亘西北數千百里。而東南亦皆搖撼。以古證今。未見若此之廣且甚也。安得不謂之大異乎。廟堂之上。謂宜朝不暇食。夕不安寢。思所以更絃易轍。為備豫急變之策。方且恬然自安。不以經意。何異乎依危幕而不知懼。履冰而不自覺。世無是理也。必明其致震之因。而求其安震之道。則庶乎矣。可矣。夫地道柔而靜。無故而動。以為地之變。殊不知地無附麗。實依

於天之中。地亦氣中之一物耳。先賢謂天形如雞子。其殼也。地黃也。日月星辰黃外之白也。易曰。天行健。君子以自強不息。蓋天圓而獨運於兩間。一氣周流。循環無已。則地得以遂其養生之性。若天運有一息之間斷。而地不能自存矣。故其變也。為震為裂。為崩陷。為水潦。為草木枯傷。皆由此也。如人之一身。一日一萬三千五百息。周而復始。若一息不順。則肉腠膚蟻。壅而為癰疽。逆而為癥瘕。故曰。陽用其精。陰用其形。精損則形傷。蓋必然之理。天為乾。為陽。君道也。地為坤。為陰。臣道也。天運愆感。故地道失常。驗之於人。則知巨蠱之不振。亦由乎君德運量之未至也。傳曰。天氣下降。地氣上騰。二氣交而成泰。一有不交。則變而為否。竊聞古者人君每日視朝。不違寧處。故欲上意下達。下情上通。故能致天下於泰和之域。又聞古者凡遇災異。必詔求直言。極諫。異有以補時政之不逮。達民隱之未知。故能感

格天地。轉禍為祥。今得奏之。臣有限。而奏事之日甚稀。憂愛之忠。雖至。而九重之邃不聞。君臣隔塞。情懷莫抒。是猶天地之氣不交。安得不反泰而否乎。然則胡為天不示變而獨見之地震者。良由群臣不能順承天地。下遂萬物之情。故變見乎地。以深儆之。固已明矣。何以言之。嘗觀漢史翼奉之言曰。地變為陰氣太盛。宜疏右黨。親百姓。出後宮。損陰氣。李尋之言曰。地震有上中下。上位應妃后。中位應大臣。下位應庶民。宜弱外戚。強本朝。崇陽抑陰。以救其咎。或以言游岐土木。或以言官臣嬖倖。或以言小人黨威。各因其時弊而指斥之耳。以今日之人事觀之。閭儀嚴肅。女謁不行。如呂常之專。趙撝之寵。無有也。後宮列陳。名不盈數。如三千一萬之充滿。無有也。秉國者皆色目漢兒。未嘗一官任舅后之族。如呂霍上官之僭奢。無有也。數妻出納。非省臺不得與聞。未嘗一事出閭官之口。如恭顯魚程之專擅。無

有也。春秋出畋。循行故典。宮牆殿宇。一安舊規。如阿房複閣之異。樓船錦纜之侈。無有也。然則致是變也。既皆非此之故。則當歸之孰也。大臣矣。今大小政事。總於都省。有奏皆准。無言不行。意欲若此。君亦從其若此。意欲如彼。君亦從其如彼。不聞天子以己意強用一官。奪行一事。則官之不職。事之不舉。是誰之過歟。不聞天子以私欲行一不義。殺一不辜。則仁心之未被。德政之未敷。是誰之過歟。為執政天臣者。烏得以辭其咎哉。既得君。又得時。又得可為之權。亦可以有為矣。使不可為。則諉曰。非我之過。使得為之。而安忍不肯為。愚不知其何心。且近來朝廷所行。其忤天意。拂人心者。殆無一端。民之所欲。天必從之。使能取弊政一整而新之。民心既順。安知天意之不與乎。如直言所當求也。近雖容受陳言。可即行之。否即舍之。而乃反復裁。動經旬月。議以為非。已同故紙。議以為是。亦成虛文。非時政之弊乎。

賢才所當進也。未聞朝廷因一言而知一人。由一能而擢一職。若舉書尺轉送。必湏勢援梯引。次則起見禮先容。賄賂取悅。舍此之外。決不能無因而至前也。近聞廉察交章。早以薦者不少。使果賢也。既不佳之風憲。亦宜陞之民職。省咨臺呈。以至者亦多。使果有治效也。既不加以資品。亦宜賜之褒獎。今保在甘室者。已成子虛。呈到省者。亦化烏有。非時政之弊乎。選法所當清也。近吏曹銓擬。縱私逾甚。集賢翰林。亂保滋多。待除求進之人。接袂摩肩。有求平之鳴。溢于閭巷。選法紊壞。日甚一日。非時政之弊乎。官冗吏繁。所當減併也。近聞置百商度。當盡猶豫半歲。竟已寂然。夫添一官。必為民增一害。省一職。則為民法一蠹。此理甚明。其事甚易。合存則一併。合革則革。立談可決。正不用如此狐疑也。非近事之失乎。刑賞所當明也。近聞採訪使。巡行各道。所斷官吏。皆絕知識。失計置之徒。若稍有智力者。已望風先為逸罪之謀。

矣。潛形掩冠。必無逃理。建鼓求仁。誰不趨避。中以私情。縱放僥倖。脫免者。何可勝數。大奸巨蠹。未嘗少懲。兼巡歷之廣。關人之多。豈非禹類。拔萃者。亦不聞薦一賢為國家深長計。以言乎刑。則未公。以言乎賞。則未見。非近事之失乎。俸祿所當均也。近增官吏俸米。通支糧工十八萬餘石。外任分給公田。多歸於具負冗職。實勤王事。則不免乎號寒啼飢。內任雖曳紫懸金。亦可企斯。而買桂炊玉。居甚不羈。嚴蠶之以升斗之糧。莫能禁其尋尺之枉。徒多費太倉之粟。實未得均祿之道。非近事之失乎。怯薛所當裁減也。近奏准分掠中外忻快。而各官掩護。力寢其行。良家有才無力之士。反不見取。軍站雜色無賴之流。則當直自着。非近事之失乎。奔競所當息也。今求仕必須親身。隨等必待營幹。若朝市之近。山林之遠。有閉戶讀書。絕跡權門者。決無得官之理。又非時政之弊乎。法律所當定也。竊聞都城內外。近聞亦

有強盜夜劫之風。且聞臨清以由河四以地。私醜私牛。狼藉官道。藐視官府。若無所禁。雖都下正自不少。外路槩亦可知。是人心全無忌憚也。又非時政之弊乎。風俗所當正也。京關之地。教化所先。淫風大行。滅棄廉恥。南北之民。相習為誼。鬻婦販子。絕恩離情。今天下皆急私而慢公。先利而後義。所關甚不小也。又非時政之弊乎。物價所當平也。近來鈔價賤。物價踊。昔直一錢者。今直一貫。物直錢而鈔不直錢。若不改易鈔。濬增造銅錢。則民生之危。憂殆未已也。又非時政之弊乎。學校所當崇也。而視為不急之務。往往求進者。因朝廷不以為重。多不揆己而妄求。而朝廷亦以為輕。故不擇人而准保。非惟主領失。今學校虛設。而選法之壞。士風之薄。亦職此之故。又非時政之弊乎。備荒所當急也。近觀省部議行賑濟。標散戶帖。每石六貫伍佰。我糧官米。每石一十六貫。百姓均為皇帝之赤子。而限以有無戶帖之

分。米糧均為皇家之公儲而自為高下價鈔之異。如今年關倉止數
處耳。未足以言荒也。或有甚於此。更直連歲之歉。出有限之見管應
未已之長飢。將何以救之。每年沿河道運糧。幸賴洪休。安然得濟。或遇
不測之風濤。一歲所仰。沒為泥沙。將何以繼之。修舉儲蓄之條。置主
義倉之策。執政者何不究心乎。借道所當抑也。而紅帽黃冠。騷閭巷
陌。二司頭目。分布郡縣。朝廷上下仰之如日月。畏之如雷霆。而官府
士民嫉之如仇讎。惡之如蠱賊。以能祈請而獲福。懷度而免禍。必無
地震之變矣。其為虛妄。顯然可。今一番災異。則一番好事。災異愈
甚。而好事愈廣。豈天地示敵之。王專為僧道布施之階。執政者何不
深省乎。貢舉所當行也。雖官。於詔書。終然付之埋沒。今合朝官職。
盡屬吏員。其進身也。既不出於文學。亦不由於選舉。問其吏。則不知
民間疾苦。問其儒。則不通文理。可讀。十數年後。儒之類。咸欲求識一

丁字者。亦無之矣。雖未。至焚書坑儒。而不焚之。焚不坑之坑。其禍尤
烈於昔。此事大有關於一垣亂之故。執政者何不垂鑒乎。武備所當修
也。今將帥重臣。皆承祿丁第。不經兵事之少年。軍卒戰士。乃互換者
名。不習騎射之情夫。一二擊生意外。驅弱將冗兵。投之敵前。其為國
家大計。甚可憂也。執政者。何無遠慮乎。賦役所當平也。如軍站既已
出力當官。每歲租入。僅丁支持。而匠戶之貧窶。尤甚。豈堪重併當差
餒恨吞聲者。言莫訴。如二兩戶。雖無劫勞。實關國體。傳曰。土之美者善
養禾。君之明者善養士。今儒人之二稅。既輸。初無換於公上。但與除
免雜泛差役。少安其心。在。見朝廷舉育人材之意。可也。如借道戶計
隱。已過半。仍復全免。深。而不均。此事尤切於民。執政者。何不動念乎。
民瘼所當瘳也。近年以來。存恤之詔屢頒。而舉目之雍熙之。和。等。虐
之政。罕有。而比屋交愁。先心之聲。亦當思其所以然之故矣。今閩關之

下由里之中。寬民抑事。豈如蠅毛。雖罄南山之竹。莫能枚舉而條陳。然疏遠瑣碎之務。安得一一上煩朝廷。而朝廷亦無以盡知之。故漢相平勃。於決獄錢穀。幾一問之間。而謝曰不知。蜀相亮。罰二十以上。皆身親之。失於太察。蓋謂士大夫各有司存也。使路府州縣牧民之官。任得其人。各盡所職。則允可以益於民間者。自能盡舉。若任非其人。縱其殘暴。雖日嚴禁治之章。亦不至而戶曉。亦無效於百姓也。故曰安民無他道。在乎知人而已。任取貝去邪一事。尤為廟堂之急先務。執政者豈可尚付之悠悠乎。凡此七言。皆致變之因也。究其所因而求其安變之道。亦無出於此。朝廷一出舉一動之間。神明在上。昭不可欺。能盡目前當行之事。則無遠不通。無幽不格矣。昔陶侃謂禹惜寸陰。常人當惜分陰。今觀大臣群僚。皆持祿顧望。相與依違。堂食既升。一日又了。務為淺近者。不求其遠。者大者。暖衣飽食。樂以忘憂。不思在下之窮

人飢寒所迫。度日如年。豈非易過也。近朝廷完議一事。至數月不得施行。終歲之間。寧堪幾議。雖以司隸不能為理。而謂負天下之寄。可如是乎。萬機之輻湊。如小之趨海。馬巨川三百。支流三千。奔忙雜沓。莫之能禦。日夜繼之以尾閭。猶懼不疏。乃欲持瓢抱甕。區區以升斗計之。其不氾濫於中土者幾希。休運難逢。良辰豈再。異至不應。災將隨之。失今不圖。則後禍不可知也。常人之言曰。地變因於天運。天子宜減膳徹樂。今吾君之服御。供饌務從儉朴。雖大禹之惡衣菲食。不_是過樂人如林。非大朝此而音律不入於耳。愚以為膳不必減也。樂不必徹也。但使通下情。責官員效。內脩己德。上應天心。則天地之氣交。而萬物咸通矣。常人之言曰。地變應乎中位。大臣宜避位辭祿。今都堂一新。隆膺委任。正是協贊扶危。鞠躬致命之時。當思體坤以承乾。戒凶而致吉。愚以為位不必避也。祿不必辭也。但使庶事畢張。群賢咸

集首司盡職。萬姓全生。元可以竭臣道之當為者。無所不至。則妖沴自消。休祥自降。德合無疆。乃終有慶矣。常人之言又曰。凡變異之來。宜布新頒。赦減稅放租。以安人心。以答天譴。斯言無稽。必不可信。傳曰。無赦之國。其刑必平。故諸葛孔明之治蜀。絕口不言赦。而國以大治。若肆赦之頻。徒以長奸貪。資盜賊。初無利於君子也。奸貪盜賊。乃覆載之所不容。因變而復赦之。寧不重神人之怒乎。書曰。懷保小民。又曰。以小民受天永命。蓋天意所屬。惟在小民。若減放之多。徒以繼富。初無利於小民也。彼終歲勤動。僅食其力。戶無稅而官無租。縱除免天下十年之糧。而小民亦不沾分毫之賜。富豪亂衆。乃幽明之所同忿。因變而附益之。又非以重神人之怒乎。為此謀者。實無補於時政之闕失。是猶田舍翁。適遭患難。橫運。不知自反。遽修因果。以為禳災。徵福之計。亦愚甚矣。伏惟聖君賢相。其拒之絕之。介夫久隨。禁直。愧乏才資。廁名學官。粗償書債。而于拳愚。忠不忍目中之無人。遂吐平生之耿耿者。既揆情無所覲望。故出辭不避振觸。比見陳言不為少矣。立奇者則不切時務。希賞者則尊尚貢諛。取合者則興利以喻國。欲求其議論正大。識見高明。達變通時之士。蓋十無一二也。昔人有言。忠臣不順時而取寵。烈士不惜死而偷生。愚雖未能自附於忠臣烈士之目。而夙昔所期。不肯多讓。自度所言。誠有足采。不懼斧鉞。丹于天聽。如以為可。則見之施行。國家幸甚。生民幸甚。

歷代名臣奏議卷之六十九

法祖

東漢章帝時。校書郎楊終上書曰。秦築長城。功役繁興。胡亥不革。卒亡四海。故孝元棄珠崖之郡。光武絕西域之國。不以介鱗。易我衣裳。魯文公毀泉臺。春秋譏之曰。先祖為之。而已毀之。不如勿居而已。以其妨害於民也。襄公作三軍。昭公舍之。君子大其復古。以為不舍則有害於民也。今伊吾之役。樓蘭之屯。久而未還。非天意也。帝從之。賜還徙者。悉罷邊屯。

吳烏程侯寶鼎元年。左丞相陸凱上疏曰。臣竊見陛下執政以來。陰陽不調。五星失晷。職司不忠。姦黨相扶。是陛下不遵先帝之所致。夫王者之興。受之於天。脩之由德。豈在宮乎。而陛下不諮之公輔。便威意驅馳。六軍派離。悲懼逆犯。天地天地以災。童歌其歌。縱令陛下

身得安百姓愁勞何以用治。此不遵先帝一也。臣聞有國以賢為本。夏殺龍逢。殷獲伊摯。斯前世之明效。今日之師表也。中常侍王蕃責中通理。處朝忠謇。斯社稷之重鎮。大吳之龍逢也。而陛下忿其苦辭。惡其直對。梟之殿堂。屍骸暴弃。邦內傷心。有識悲悼。咸以吳國夫差復存。先帝親賢。陛下反之。是陛下不遵先帝二也。臣聞宰相國之柱也。不可不强。是故漢有蕭曹之佐。先帝有顧步之相。而萬歲瓊才。凡庸之質。昔從家隸。超步紫闈。於或已豐於器已溢。而陛下愛其細介。不訪大趣。崇以尊輔。越尚舊臣。賢良憤惋。智士赫咤。是不遵先帝三也。先帝憂民。過於嬰孩。民無妻者。以妻妻之。見單衣者。以帛給之。枯骨不收。而取埋之。而陛下反之。是不遵先帝四也。昔桀紂滅。由妖婦幽厲亂在嬖妾。先帝鑒之。以為身戒。故左右不置淫邪之色。後房無曠積之女。令中官萬數。才備饋饋。外多鰥夫。女吟於中。風雨遂度。正

由此起。是不遵先帝五也。先帝憂勞萬幾。猶懼有失。陛下臨卽以來。遊戲後宮。眩惑婦女。乃令庶事多曠。下吏容姦。是不遵先帝六也。先帝為尚朴素。服不純麗。宮無二向臺物。不彫飾。故國富民充。姦盜不作。而陛下徵調州郡。竭民財力。上被玄黃。宮有朱紫。是不遵先帝七也。先帝外杖顧陸朱張。內近胡綜薛綜。是以庶績雍熙。邦內清肅。今者外非其任。內非其人。陳聲曹輔。斗筭小吏。先帝之所弃。而陛下幸之。是不遵先帝八也。先帝每宴。見群臣。抑損醇醪。臣下終日。無失慢之尤。百寮庶尹。並展所陳。而陛下拘以視瞻之敬。懼以不盡之酒。夫酒以成禮。過則敗德。此無異商。于長夜之飲也。是不遵先帝九也。昔漢之桓靈。親近宦豎。大失民心。今高通詹廣羊度黃門小人。而陛下賞以重爵。權以戰兵。若江渚有叛。烽燧互起。則度等之或不能禦侮。明也。是不遵先帝十也。令官女曠積。而黃門復走州郡。條牒民女。有錢

則舍無錢則取。怒呼道路。母子死訣。是不遵先帝十一也。先帝在時亦養諸王太子。若取乳母。其大復役。賜與錢財。給其資糧。時遣歸來。視其弱息。令則不然。夫婦生。解夫故作役。兒從後死。家為空戶。是不遵先帝十二也。先帝歎曰。國以民為本。民以食為天。衣其次也。三者孤存之於心。令則不然。農桑並廢。是不遵先帝十三也。先帝簡士。不拘卑賤。任之鄉閭。效之於事。舉者不虛。受者不妄。令則不然。浮華者。譽明黨者進。是不遵先帝十四也。先帝戰士。不給他役。使春惟知農。秋惟收稻。江渚有事。責其死效。令之戰士。供給衆役。廩賜不贍。是不遵先帝十五也。夫賞以勸功。罰以禁邪。賞罰不中。則士民散失。令江邊將士。死不見哀。勞不見賞。是不遵先帝十六也。令在所監司。已為煩擾。兼有內使擾亂其中。一民十吏。何以堪命。昔景帝時。交趾反亂。定由盜起。是為遵景帝之調。不遵先帝十七也。夫校事。吏民之仇也。

先帝末年。雖有呂壹錢欵。尋皆誅夷。以謝百姓。令復張立枝曹。縱吏言事。是不遵先帝十八也。先帝時。居官者歲久於其位。然後考績黜陟。令州郡職司。或在政無幾。便為召還。轉迎新送舊。紛紜道路。傷財害民。於是為甚。是不遵先帝十九也。先帝每察竟解之奏。常留心推擇。是以獄無冤囚。死者吞聲。令則違之。是不遵先帝二十也。若臣言可錄。藏之盟府。如其虛妄。治臣之罪。願陛下留意。

後魏孝明帝時。河陰令高謙之上疏曰。臣以無庸謬宰神邑。實思奉法不撓。稱是官方。酬朝廷無貲之恩。盡人臣守器之節。但豪家支屬。戚里親鄰。縲維所及。舉目多是。皆有盜憎之色。咸起怨上之心。縣令輕弱。何能克濟。先帝昔發明詔。得使面陳所懷。臣亡父先臣崇之為洛陽令。常得入奏。是非。所以朝貴斂手。無敢干政。近日以來。此制遂寢。致使神宰威輕。下情不達。今二室遠遵堯舜憲章。高祖。愚臣聖策。

其爲寡少立功名。乞新舊典更明定制。庶姦豪知禁。頗自屏心。詔曰。此啓深會朕意。

宋仁宗明道二年。殿中侍御史龐籍上奏曰。臣近因上殿。面奉聖旨。令有事。其實封進來者。臣退量辱。呼問通政體。誤膺詢訪。苟有愚見。敢不罄陳。恭惟三聖垂統。紀律大。陛下文明恭儉。紹隆寶圖。祗守先訓。克臻至治。臣竊見朝廷政令。有漸異祖宗之制。而宜改復舊貫者多矣。略舉數事。條之如左。

一。進退輔臣。最爲大事。非止一時褒貶。蓋欲垂戒後來。祖宗舊制。輔佐近臣。罷免之例甚衆。有因求退得請者。有均以勞逸爲名者。有暴其顯過者。有隱其罪。而實者。然所授官秩。輕重皆有區別。伏見去年執政之臣。最喧物議。內有廢棄典法。公營私寵者。此最昭昭於天下也。臣於去冬。及今年正月七日。兩上書疏。及劄

子。言之已詳。昨者外間鎖院。衆謂必獲罪而退。洎制命宣行。大者得使相。次者尋亦遷秩。况使相請俸。月踰千緡。中常州郡。一年之賦。未足充其歲給。自非有功有德。何以克勝。且登用未及一考而退之者。是以譴罷也。乃以使相及遷秩。廢之以此爲戒。臣恐來者不懼矣。必曰。當權之日。雖壞國法。營私恩。亦不失作使相及遷秩矣。臣欲望聖明。使史臣檢尋祖宗以來。進退輔臣體例。著爲篇部。以備聖覽。此後用爲定準。如此。則忠正者持衡之時。務盡公理。乞身之日。得以禮退。私曲者。使之當權。必懷畏懼。苟至獲罪。永爲懲戒。此事體大。乞留至懷。

一。前代職官之制。皆有定員。使上下不得超越而進也。國朝建官。雖異於古。然於員數。未聞過多。近年以來。漸異於此。蓋是好進者。務于求寵名。執政者。不堅守舊制。故也。今資政殿翰林侍讀

學士員數過多。恐增之不已。更無限局。欲望準約舊典。以立定員。員既有限。求者自息矣。

金紫者。文臣之貴服也。祖宗以來。謹重賜典。自前或因差遣上殿。特恩賜之。然多是已在升陟任使者。近年伏見有差遣未出常調。或祇是知縣之類。因公事上殿。亦得改賜。遂使三品之服。漸成輕易。臣欲乞變重服章。燕及僥濫。

竊知向來每因南郊大禮。添出諸般差遣名目。多於舊日。添一差遣。則增一錫賜。所以費用太廣。實傷財力。臣欲望將來郊禮。令有司檢尋祖宗以來則例。為定免至橫添名件。廣耗官物。

臣智識愚下。無謂之德。實欲朝廷凡百政令。率由舊章。沮勸允明。僥倖咸塞。伏望聖慈。心垂采。

英宗治平元年。召唐介為御史。介奏英宗謂曰。卿在先朝有直聲。故

用卿。非繇左右言也。介曰。臣無狀。陛下過聽。願獻愚忠。自古欲治之

主。亦非求絕世俗之術。要在順人情而已。祖宗遺德。餘烈在人。未遠

願覽已成之業。以為監。則天下蒙福矣。

神宗熙寧三年。張方平上言曰。臣蒙恩朝對。今已奉辭。竊惟孤陋之

質。尚偶聖神之會。上膺眷遇。有異等倫。今承特召而來。安敢緘默而

去。輒獻愚忠。上裨天聽。臣聞人心惟危。惡生所忽。動危甚易。安之實

難。禁衛六軍。邊防三路。撫御之法。善制具存。民心戎事。國之大本。動

靜之機。安危所繫。若民心危搖。戎事興動。策慮一失。綏輯非易。祖宗

護烈。國家大計。甚所慎重。惟此二者。不同小事。隨宜改易。縱有利害。

容得更張。民猶水也。可以載舟。亦以覆舟。兵猶火也。可以焚物。亦以

自焚。焚溺之害。當在吾之先見。造形而悟。已是後時。害成乃悔。何嗟及矣。夫大臣之分。出處是常。家國大業。天下重器。譬之輜重。豈可輕

雖願陛下思所以置器於安審所以藏身之固廣聰聽於符同之外
採公議於得失之前深察軍民之情厚為社稷之慮使人安其業上
下無怨溥天之下欣戴感德高拱巖廊之上保此泰山之安朝廷專
而國體平順氣應而嘉生遂不亦休哉臣疎外狂瞽未識忌諱以此
愚言上容恩眷退就誅殛實所甘心

神宗時司馬光為翰林侍讀學士嘗安石草詔引常衮事責兩府而
府不敢獲辭安石得政行新法光逆疏其利害通英進讀至嘗參代
蕭何事帝曰漢常守蕭何之法不變可乎對曰寧獨漢也使三代之
君常守禹湯文武之法雖至今存可也漢武取高帝約束紛更盜賊
半天下元帝改孝宣之政漢業遂衰由此言之祖宗之法不可變也
呂惠卿言先王之法有一年一變者正月始和布法象魏是也有五
年一變者巡守考制度是也有三十年一變者刑罰世輕世重是也

光言非是其意以風朝廷耳而問光光曰布法象魏希舊法也諸侯
變禮易樂者王巡守則誅之不自變也刑新國用輕典亂國用重典
是為世輕世重非變也且治天下譬如居室敝則修之非大壞不更
造也公卿侍從皆在此願陛下問之

哲宗即位初守門下侍郎司馬光請更張新法上奏曰臣聞詩云毋
念爾祖率修厥德故夏道禹訓商奉湯典周守文武之法漢循高祖
之律唐行太宗之制子孫享有天祿咸數百年國家受天明命太祖
太宗撥亂反正混一區夏規摹宏遠子孫承之百有餘年四海治安
風塵無警自生民以來罕有其比其法可謂善矣先帝以睿智之性
切於求治而王安石不達政體專用私見變亂舊章誤先帝任使遂
致民多失業閭里怨嗟陛下深知其弊即政之初變其一二嗾呼之
聲已洋溢於四表則人情所苦所願灼然可知陛下何憚而不肯其

餘悉更張哉。譬如有人誤飲毒藥，致成大疾，苟知其毒，斯勿飲而已矣。豈可云姑少少減之，俟精以歲月，然後盡捨之哉？臣嘗曾上言，教閱保甲，公私勞費而無所用之。蠲免役錢，寬富而困貧，以養淳液之人，使農民失業，窮愁無告，將官專制軍政，州縣無權，無以備倉猝。萬一饑饉盜賊群起，國家可憂。此皆所害者大，所及者衆，先宜變更。借令皇帝陛下獨攬權綱，猶當早發號令，以解生民之急。救國家之危，收萬國之歡心。復祖宗之令典，况太皇太后陛下同斷國事，捨非而取是，去害而就利，於體甚而得為而不可哉。

元祐元年，哲宗御通英閣，召宰執講讀，官讀寶訓。至漢武帝藉南山提封為上林苑，仁宗曰：山澤之利，當與衆共之，何用此也？丁度曰：臣事陛下二十年，每奉德音，始不及於憂勤，此蓋祖宗家法爾。尚書左僕射燕門下侍郎呂大防因推廣祖宗家法以進曰：自三代以後，

唯本朝百二十年，中外無事，蓋由祖宗所立家法最善。臣請舉其略：自古人主事母后，朝見有時，如漢武帝五日一朝，長樂宮。祖宗以來，事母后，皆朝夕見，此事親之法也。前代大長公主用臣妾之禮，本朝必先致恭，仁宗以秩事姑之禮，見獻穆大長公主，此事長之法也。前代宮闈多不肅，官人或與廷臣相見，唐入閤圖有昭容位，本朝宮禁嚴密，內外整肅，此治內之法也。前代外戚多預政事，常致敗亂，本朝母后之族皆不預，此待外戚之法也。前代宮室多尚華侈，本朝宮殿止用赤白，此尚儉之法也。前代人君雖在宮禁，出輿入轎，祖宗皆步自內庭，出御後殿，豈乏人力哉？亦欲涉歷廣庭，稍冒寒暑，此勤身之法也。前代人主在禁中，冠服苟簡，祖宗以來，燕居必以禮，竊聞陛下昨郊禮畢，具禮謝太皇太后，此尚禮之法也。前代多深於馬刑，大者誅戮，小者遠竄，惟本朝用法最輕，臣下有罪，止於罷黜，此寬仁之法。

也。至於虛己納諫。不好田獵。不尚翫好。不用玉器。不貴異味。此皆祖
宗家法。所以致太平者。陛下不須遠法前代。但盡行家法。足以為天
下。哲宗甚然之。

二年正月。翰林學士朝奉郎知制誥蘇軾奏曰。臣近以試館。與
為臺諫所言。臣初不敢深辨。蓋以自辯而求去。是不欲去也。今者竊
聞明詔已察其實。而臣四上章。四不允。臣子之義。身非己有。詞窮理
盡。不敢求去。是以區區復一自言。臣所撰策問。首引周公太公之治
齊魯。後世皆不免衰亂者。以明子孫不能奉行。則雖大聖大賢之法。
不免於有弊也。後引文帝宣帝仁厚而事不廢。故實而政不苛者。以
明臣子若奉行得其理。無觀望希合之心。則雖文帝宣帝足以無弊
也。中間又言六聖相受。為治不同。同歸於仁。其所謂嬗與刻者。專謂
今之百官有司及監司守令不識朝廷所以師法先帝之本意。或至

於此也。文理甚明。若黑白。何嘗有毫髮疑似。議及先朝。非獨朝廷
知臣無罪可放。臣亦自知無罪可謝也。然臣聞之。古人曰。人之至信
者。心目也。相親者。母子也。不直者。聖賢也。然至於竊齊而知心目之
可亂。於投杼而知母子之可疑。於拾煤而知聖賢之可惑。今言臣者
不止三人。交章累上。不啻數十。而聖斷確然。深明其無罪。則是過於
心目之相信。母子之相親。聖賢之相知。遠矣。德音一出。天下頌之。史
冊書之。自耳目所聞見。明智者。達洞照情偽。未有如陛下者。非獨微
臣區區欲以一死上報。凡天下之為臣子者。聞之。莫不欲碎首糜軀。
効忠義於陛下也。不然者。亦非獨臣受賸昧之謗。凡天下之為臣子
者。聞之。莫不以臣為戒。崇尚忌諱。畏避形跡。觀望雷同。以求免。豈
朝廷之福哉。臣自聞命以來。一食三歎。一夕九興。身口相誅。未知死
所。然臣所撰策問。以實亦有罪。若不盡言。是欺陛下也。臣聞聖人之

治天下也。寬猛相資。君臣之間。可否相濟。若上之所可。不可。其是非下亦可之。上之所否。不問其曲直。下亦否之。則是晏子所謂以水濟水。誰能食之。孔子所謂惟予言而莫予違。足以表邦者也。臣昔於仁宗朝。舉制科。所進策論。及所答聖問。大抵皆勸仁宗勵精。庶政。督察百官。果斷而力行也。及事神宗。蒙召對訪問。退而上書數萬言。大抵皆勸神宗忠恕仁厚。舍垢納污。屈己以裕人也。臣之區區。不自量度。常欲希慕古賢。可否相濟。蓋如此也。伏觀二聖臨御。已來。聖政日新。一出忠厚。大率多行仁宗故事。天下翕然。銜戴恩德。固無可議者。然臣私憂過計。常恐百官有司。矯枉過直。或至於媮。而神宗勵精核實之政。漸致隳壞。深慮數年之後。馭吏之法。漸寬。理財之政。漸疎。備邊之計。漸弛。則意外之憂。有不可勝言者。雖陛下廣開言路。無所諱忌。而臺諫所擊。不過先朝之人。再非不過先朝之法。正是以水濟水。臣竊憂之。故輒用此意。撰上件策問。實以諷諭今之朝廷。及宰相臺諫之流。欲陛下覽之。有以感動聖意。庶幾無行二帝忠厚勵精之政也。臺諫若以此言。臣朝廷若以此罪。臣則斧鉞之誅。其甘如薺。今乃以為譏諷先朝。則亦疎而不近矣。且非獨此策問而已。今者不避煩瀆。盡陳本末。臣前歲自登州召還。始見故相司馬光。光即與臣論當今要務。條其所欲行者。即答言。公所欲行者。諸事皆上順天心。下合人望。無可疑者。惟役法一事。未可輕議。何則。差役免役。各有利害。免役之害。倍斂民財。十室九空。錢聚於上。而下有饑荒之患。差役之害。民常在官。不得專力於農。而貪吏猾胥。得緣為姦。此二害。輕重蓋略相等。今以彼易此。民未必樂。光聞之愕然曰。若如君言。計將安出。臣即答言。法相因。則事易成。事有漸。則民不驚。昔三代之法。兵農為一。至秦始分為二。及唐中葉。盡變府兵為長征之卒。自爾以來。民不知兵。

治天下也。寬猛相資。君臣之間。可否相濟。若上之所可。不可。其是非下亦可之。上之所否。不問其曲直。下亦否之。則是晏子所謂以水濟水。誰能食之。孔子所謂惟予言而莫予違。足以表邦者也。臣昔於仁宗朝。舉制科。所進策論。及所答聖問。大抵皆勸仁宗勵精。庶政。督察百官。果斷而力行也。及事神宗。蒙召對訪問。退而上書數萬言。大抵皆勸神宗忠恕仁厚。舍垢納污。屈己以裕人也。臣之區區。不自量度。常欲希慕古賢。可否相濟。蓋如此也。伏觀二聖臨御。已來。聖政日新。一出忠厚。大率多行仁宗故事。天下翕然。銜戴恩德。固無可議者。然臣私憂過計。常恐百官有司。矯枉過直。或至於媮。而神宗勵精核實之政。漸致隳壞。深慮數年之後。馭吏之法。漸寬。理財之政。漸疎。備邊之計。漸弛。則意外之憂。有不可勝言者。雖陛下廣開言路。無所諱忌。而臺諫所擊。不過先朝之人。再非不過先朝之法。正是以水濟水。臣竊憂之。故輒用此意。撰上件策問。實以諷諭今之朝廷。及宰相臺諫之流。欲陛下覽之。有以感動聖意。庶幾無行二帝忠厚勵精之政也。臺諫若以此言。臣朝廷若以此罪。臣則斧鉞之誅。其甘如薺。今乃以為譏諷先朝。則亦疎而不近矣。且非獨此策問而已。今者不避煩瀆。盡陳本末。臣前歲自登州召還。始見故相司馬光。光即與臣論當今要務。條其所欲行者。即答言。公所欲行者。諸事皆上順天心。下合人望。無可疑者。惟役法一事。未可輕議。何則。差役免役。各有利害。免役之害。倍斂民財。十室九空。錢聚於上。而下有饑荒之患。差役之害。民常在官。不得專力於農。而貪吏猾胥。得緣為姦。此二害。輕重蓋略相等。今以彼易此。民未必樂。光聞之愕然曰。若如君言。計將安出。臣即答言。法相因。則事易成。事有漸。則民不驚。昔三代之法。兵農為一。至秦始分為二。及唐中葉。盡變府兵為長征之卒。自爾以來。民不知兵。

兵不知農。農出穀帛以養兵。兵出性命以衛農。天下便之。雖聖人復起不能易也。今免役之法實大類此。公欲驅罷免役而行差役。正如罷長征而復民兵。蓋未易也。先帝本意使民戶率出錢專力於農。雖有貪吏猾胥無所施其虐。坊場河渡官自出賣。而以其錢雇募衙前。民不知有倉庫綱運破家之禍。此萬世之利也。汝不可變。獨有二弊。多以供他用。實封取寬剩役錢。爭買坊場河渡。以長不實之價。此乃王安石呂惠卿之陰謀。非先帝本意也。公若盡去二弊而不變其法。則民悅而事易成。今寬剩役錢名為十分取二。通計天下乃及十五。而其實一錢無用。公若盡去此五分。又使民得從其便。以布帛穀米折納役錢。而官亦以為雇直。則錢荒之弊亦可盡去。如此而天下便之。則公又何求。若其未也。徐更議之。亦未晚耳。光聞。臣言大以為不然。臣又與光言熙寧中常行給田募役法。其法以係官田及以寬剩

役錢買民田。以募役人。大略如邊郡弓箭手。臣時知密州。推行其法。先募弓手。民甚便之。此本先帝聖意所建。推行未幾。為左右異議而罷。今畧計天下寬剩錢解約三千萬貫石。兵興支用。僅耗其半。此本民力。當復為民用。今內帑山積。公若力言於上。索還此錢。復完三千萬貫石。而推行先帝買田募役法於河北河東陝西三路。數年之後。三路役人可減太半。優裕民力。以待邊鄙緩急之用。此萬世之利。社稷之福也。光尤以為不可。及去年二月六日。敕下。始行。光言復差役法。時臣弟轍為諫官。上疏具論。乞將見在寬剩役錢。雇募役人。以一年為期。令中外詳議。然後立法。又將衙前一役。可即用舊人。仍一依舊數。支月給。重難錢。以坊場河渡錢。總計諸路。通融支給。皆不蒙施行。及蒙差。臣詳定役法。臣因得伸弟轍前議。先與本局官吏孫永傳堯俞之派。論難反復。次於西府及政事堂中。與執政商議。皆不見從。

遂上疏極言衙前可雇不可差先帝此法可守不可變之意因乞罷
詳定役法當此之時臺諫相視皆無一言決其是非今者差役利害
未易一二遽言而弓手不許雇天下之所同患也朝廷知之已變法
許雇天下皆以為便而臺諫猶累疏力爭由此觀之是其意專欲變
熙寧之法不復校量利害參用所長也臣為中書舍人刑部大理寺
列上熙寧已來不該赦降去官法凡數十條盡欲刪去臣與執政屢
爭之以謂先帝於此蓋有深意不可盡改因此得存留者甚多臣每
行監司守令告詞皆以奉守先帝約束毋敢弛廢為戒文案具在皆
可復按由此觀之臣豈謗議先朝者哉所以一一縷陳者非獨以自
明誠見士大夫好同惡異泯然成俗深恐陛下深居法宮之中不得
盡聞天下利害之實也願因臣此言警策在位救其所偏損所有餘
補所不足天下幸甚若以其狂妄不識忌諱雖賜誅戮死且不朽臣
無任感恩思報激切戰恐之至

右正言丁隲上奏曰臣伏見本朝祖宗之德具在方冊威明仁厚不
惟有益於當時皆可為法於後世竊惟陛下即位以來首延儒臣侍
講禁中如論語孝經皆聖賢之言行固足以啓沃上心導明睿性臣
愚欲乞既講罷經義更以祖宗故事一二端為陛下開陳仍乞曉諭
侍講臣僚豫先編敘六聖典故可以取法於後來者以備講筵聽納
庶幾前聖後聖所為所行如合符節威明仁厚之德源源相繼天下
幸甚

七年翰林侍講學士范祖禹欲帝法仁宗五事上奏曰臣掌國史伏
觀仁宗皇帝在位四十二年豐功盛德固不可得名言其可見者其
事有五畏天愛民奉宗廟好學聽諫仁宗能行此五者於天下所以
為仁也陛下嗣位于今八年昧爽而聽朝旦晝而講學風雨不易寒

暑不倦。可謂勤於進德矣。然而天衷淵默。聖度高遠。中外之人。未知陛下睿意所好。如仁宗之五者。見於天下。群臣雖欲少裨萬一。亦無所自而入。方今四海顛顛。想望太平。臣願陛下深留聖思。法象祖宗。日新輝光。昭示所好。以慰蒼群生之望。則天下幸甚。

祖禹又上奏曰。臣伏觀陛下近者郊見天地。雲止風和。景氣清霽。神祇饗春。福應尤盛。侍祀之臣。以為前後未有。都城之人。瞻望玉色。歡呼洋溢。皆云陛下克類仁宗。臣觀天意人心如此。實宗社無疆之福也。然臣愚竊以聖人福至而益戒。則能長享其福。譽美而副之以實。則能永保其譽。唯兢兢業業。不自暇逸。乃可以答天休。衆之所欲。因而從之。乃可以副民望。若一有滿假之意。則今日之福。乃他日危亂之基也。不能副之以實。則今日之譽。乃他日怨誅之端也。故臣願陛下既受大福。又獲民譽。蓋思戒慎。唯勤修德。修德之實。唯法祖宗。恭

惟一祖五宗。畏天愛民。後嗣子孫。皆當取法。惟是仁宗在位最久。德澤深厚。結於天下。是以百姓思慕。終古不忘。陛下誠能上順天意。下順民心。專法仁宗。則垂拱無為。海內晏安。成康之隆。不難致也。臣承乏史官。嘗采集仁宗聖政。得數百事。欲乞撰錄成書。上進。少資膚覽。監觀宸憲。皆舉而行。以副羣生之所願。則天下幸甚。

祖禹又上奏曰。臣竊惟太祖受天眷命。剗革五代之亂。掃風沐雨。為子孫立萬世之基。太宗平一海內。守之以文。由真宗至于神宗。皆致太平。海內晏安。百三十有四年。雖三代之盛。未有如此其久者也。自古創業之君。起於細微。身歷艱難。親履勤勞。先有功及民。然後享天下之奉。故失之者常少。守成之主。生於深宮。不歷艱難。不履勤勞。無功及民。而享天下之奉。故失之者常多。是以古人有言。創業非難。守成為難。蓋危亡必起於治安。禍亂必生於逸豫也。今陛下承六聖之

遺烈守百三十四年之大業。當思天下者祖宗之天下。不可一日而怠。人民者祖宗之人民。不可須臾而忘。百官者祖宗之百官。不可私非其人。府庫者祖宗之府庫。不可用非其道。常自抑畏。儆飭聖心。一言一動。如祖宗臨之在上。貨之在旁。則可以長享天下之奉而不失矣。自元豐之末。時運艱厄。先帝蚤棄天下。陛下嗣位。幸賴先太皇太后以大公至正為心。罷王安石呂惠卿等所造新法。而行祖宗舊政。故社稷危而復安。人心離而復合。乃至與丹主亦與其宰相議曰。南朝專行仁宗皇帝政事。可救燕京留守。使戒邊吏守約束。無生事。陛下觀戎狄之情如此。則中國人心可知也。先太皇太后日夜苦心勞力。以為陛下立太平之基。九年之間。女靜無事。已有反效。陛下但由此以待循之。則成康之隆。不難致也。臣願陛下守之以靜。毫髮無所改為。恭己以臨之。虛心以處之。詔左右大臣。動必循守祖宗法度。陸

下躬攬於上。諮諏善道。察納諫言。則群臣邪正萬事是非。必皆了然於聖心矣。夫水所以能照毛髮。而物無所隱其形者。至平也。鏡所以能鑒妍醜。而人無所遁其迹者。至明也。水所以能平鏡。所以能明者。至靜也。使水鏡自動。則雖山岳不能見也。人心亦然。唯至公可以見天下之私。唯至正可以見天下之邪。唯至靜可以見天下之動。荀卿曰。虛一而靜。謂之清明。聖人清明。理生於心之虛一也。陛下何不觀先太皇太后自英宗神宗時。不出房闈。未嘗知天下之事。一旦臨朝。所行之政。上當天意。下合人心。其故何哉。唯至公至正至靜而已。夫小人之情。專為私。故不便於公。專為邪。故不便於正。專好進。故不便於靜。唯欲人君多所作。為朝廷多所變動。則已有所希冀於其間矣。若朝政守靜。上下各安其分。則小人何所望哉。今陛下既親萬機。小人必欲有所動搖。而懷利者亦皆觀望。臣願陛下上念祖宗之難

難先太皇太后之勤勞。痛心疾首。以聽用小人為刺骨之戒。守元祐之政。當堅如金石。重如山岳。山岳可移。聖政不可改也。金石可鑿。聖心不可變也。使讒邪者不能進說。觀望者亦皆革心。則自今以待。朝廷清明。必日勝一日。歲勝一歲矣。陛下如以臣言為然。乞因大臣奏事之時。明示以聖意所向。使中外一心。歸於至正。則天下幸甚。臣久侍帷幄。不敢自同於衆人。恐有姦言邪說。惑誤天聰。故近與蘇軾先事上奏。必蒙省覽。陛下聖學稽古。不必遠師前世之事。唯是儀刑仁祖。法則太皇。使天下熙熙然。至於昆蟲草木。各安其生。則臣之志願也。不勝區區之愚。

哲宗時。殿中侍御史豐稷上疏曰。陛下明足以察萬事之統。而不可用其明。智足以應變曲當。而不可用其智。順考古道。二帝所以聖儀刑文王。成王所以賢。願以洪範為元龜。祖訓為寶鑑。一動一言。思所

以為則於四海。為法於千載。則教化行。習俗美。而中國安矣。

祕書省校書郎陳瓘上奏曰。堯舜禹皆以若稽古為訓。若者順而行之。稽者考其當否。必使合於民情。所以成帝王之治。天子之孝與士大夫之孝不同。帝反復究問。意感悅。

徽宗時。任事者多乖異不同。御史中丞王覲言。堯舜禹相授一道。堯不去四凶而舜去之。堯不舉元凱而舜舉之。事未必盡同。文王作邑于豐而武王治鎬。文王關市不征。澤梁無禁。周公征而禁之。不言其為善。繼善述神宗作法于前。子孫當守于後。至於時異事殊。須損益者。損益之。於理固未為有失也。

著作郎楊時面對奏曰。堯舜曰。允執厥中。孟子曰。湯執中。洪範曰。皇建其有極。歷世聖人。由斯道也。熙寧之初。大臣文六藝之言。以行其私。祖宗之法。紛更殆盡。元祐繼之。蓋復祖宗之舊。熙寧之法。一切廢

車。至紹聖崇寧。抑又喜焉。凡元祐之故事。著在令甲。皆焚之以滅其跡。自是分爲二黨。縉紳之禍至今未殄。臣願明詔有司。條具祖宗之法。著爲綱目。有宜於今者。舉而行之。當損益者。損益之。元祐隆慶。置勿問。一趨於中而已。

欽宗靖康元年。河東北宣撫使李綱。乞深考祖宗之法。劄子曰。臣總師道出鞏洛。望拜陵寢。潸然涕流。恭惟祖宗創業守成。垂二百年。聖聖傳受。以至陛下。適丁艱難之秋。戎狄內侵。中國勢弱。此誠陛下當瞻思報勵。精求治之日。伏望聖慈。深考祖宗之法。一一推行之。違者予退。小人。乘以利口善譎言爲足信。無以小有才。未聞君子之大道。爲足使。蓋固邦本。以圖中興。上以慰安九廟之靈。下以爲億兆蒼生之所依賴。天下不勝幸甚。臣忘生編。死冒進狂言。不勝戰越待罪之至。

欽宗時。李光乞討論祖宗故事。劄子曰。臣恭聞仁宗皇帝有言曰。準之先民。孰若率祖。禘之爲重。大哉王言。臣嘗謂自生民以來。言守成之君者。莫盛於高宗。書稱其德曰。暨于先王。成憲其永。無愆。然則治天下者。曷可不以祖禘爲法哉。恭惟聖宋之興。太祖太宗。以英文烈武。戡定禍亂。創業垂統。規摹宏遠矣。五宗守成。以至道君。上皇繼述之美。天下治安。幾二百年。明禮樂。修政刑。內則躬節儉。以涵育生靈。外則謹邊防。以制御夷狄。州郡之政。摠之監司。監司之權。歸之郡縣。上下相維。內外相統。若身之使臂。臂之使指。無不順者。陛下天縱神聖。潛養既久。更事亦多。伏自踐祚以來。夙興夜寐。兢兢業業。思祖宗致王業之艱難。知太平之世難得而易失。延見群臣。勤精求治。首以紹復祖宗故事爲言。此誠社稷之福。生民之幸。然祖宗成法。具載典冊。條目非一。未易驟舉。伏望慈明詔三省樞密院大臣。遴選宿儒精

加討論。可因否革。勿拘以年紀。損益更張。務合乎中制。庶幾年歲之間。漸復祖宗之盛。天下幸甚。

高宗建炎三年。趙元鎮上奏曰。臣竊惟國家之有天下也。始以太祖之武。遠創業垂統之功。繼以仁宗之仁。得持盈守成之道。聖治之術。先後相成。垂裕後昆。為法萬世。哲宗時。講官顧臨進言曰。今不志遠引堯舜三代之法。如祖宗之法。則陛下之家法也。宰相呂大防因舉祖宗之法。切於時政者十數事。當時以為美談。恭惟皇帝陛下。承列聖之後。履茲厄運。孜孜圖治。亦知有所稽法哉。近降赦文。專用嘉祐勅令。是將法乎仁宗之仁矣。至於臨部伍。申號令。親戎旅之事。推腹心。同甘苦。協將士之情。赫斯一怒。旋乾轉坤。又以法乎太祖之武。則中興之治。誠不難致。是皆陛下之家法也。舉而措之。事業之間。復何加焉。尚願持之以不倦之誠。而期於必成之效。則天下幸甚。

高宗時。吏部侍郎秦崇禮上奏曰。臣伏見自渡江以來。官司案籍。例皆不存。而吏部所掌官簿。尤難稽考。故遂急申明。以為約束。其目非一。士大夫到部。凡磨勘注擬賞功任子之類。皆祖有條理。其後亦稍稍尋訪舊法。在部見今遵用。然風俗之薄久矣。吏部隨事申明。有所從寬。以便人情。士既習見其事。則雖有舊法。而於己不便者。則必群譟衆起。千訴百端。必欲有司申明。以破舊法。如是者多矣。臣竊思之士農工商之四者。皆陛下之民也。亂離以來。士之失職者固可憫矣。聖訓孜孜。未嘗不以是為言。而今之在官者。亦所同恤。而無異詞也。獨不念今三農之務。與百工之肆。商旅往來之塗。亦能無失其業。而官之為法。曾少優於承平時否。然則吏部所以待天下之士。恐不可以廢舊法。而專徇一時之人情也。臣愚欲望聖慈。特降睿旨。應吏部自渡江以來。凡所申明與舊法相戾者。並從舊法。其因去失案籍。稽

置指揮。令逐一類。果看詳。若舊法已有該載。不妨遵用者。取旨別行
判定。仍降指揮。應吏部條目。已有舊法者。今後不許申明。權宜改易。
庶幾士安分守。而有司不至廢法。亦中興之政。所先務也。

宗禮又上奏曰。臣竊見近者。揚惟忠。邢煥。皆以節度使致仕。即不曾
鑠院降麻。伏緣節度使除拜移改。若恩加之類。並須宣制。豈有見帶
節鉞致仕。而獨不然。此一時之闕典也。臣嘗記祖宗時。凡節將。臣寮
得謝。不以文武並納節。別除一官致仕。如仁宗朝。張耆。自使相授太
子太師。楊崇勳。授太子太保。神宗朝。李端愿。自節度使授太子少保。
致仕。皆武臣也。惟熙寧間。富弼。以元勳舊相。始令特帶節鉞致仕。獨
猶力辭。不敢當者久之。其後相繼者。則曾公亮。文彥博也。他人豈可
援以為例耶。近歲以來。致仕者。不問何人。不復納節換官。亦恐有違
舊制。臣愚欲望聖慈。特降睿旨。并令三省樞密院。討論舊典施行。

起居郎周麟之上奏曰。臣聞書曰。監于先王成憲。其永無愆。詩亦言
酌先祖之道。以養天下。然則前聖典謨。布在方冊。後代纂之。實為大
訓。顧可後哉。昔唐史臣吳兢。嘗采太宗與群臣對問之語。為貞觀政
要。三百年治亂之龜鑑。舉不出乎此。洪惟國朝。以聖繼聖。傳襲一道。
故亦有寶訓之書。追倣前制。發揚先烈。陛下紹隆丕緒。祇通燕謀。立
政立事。未嘗不以祖宗為法。臣職在東觀。修纂日曆之暇。竊觀祖宗
寶訓。自太祖皇帝。至英宗皇帝。五朝並已成書。惟神宗皇帝。以後修
纂未備。喪亂以來。舊本不存。將何以昭示萬世。自陛下中興。屢降睿
旨。委官纂次。因循迄今。未應明詔。憲章祖述。庸有闕焉。臣愚欲望聖
慈。申命史館。速加研考。以次條類。續為成書。庶以章累朝重規疊矩
之懿。明陛下繼志述事之美。

左正言鄧肅上奏曰。臣於今月初八日。以本職上殿。因奏論次。遂言

夷狄之巧。在文書簡。簡故速。中國之患。在文書煩。煩故遲。今日事幾
豈可遲也。面奉聖訓曰。正此討論。欲併二省。盡依祖宗法。臣切欣幸。
以為太平興國之治。可以指日而望矣。恭惟太祖太宗之時。法嚴而
令速。事簡而官清。未嘗旁搜曲引。以稽賞罰。故能以十萬精兵。分布
四海。取嶺蜀。平江南。來吳越。下河東。紛紛萬國。莫不稱臣。混一六合。
如指諸掌。此一時富庶。所以速達成康。而豐功偉績。又有以過之也。
自時厥後。日趨太平。群臣無可論者。今日獻一策。明日獻一言。簡髮
數米。惟恐不備。此文書所以日益煩。而政事所以日益緩也。願今天
下如何哉。兵戈未息。邊鄙未寧。朝廷措置。當如救焚。如拯溺。豈可揖
遜進退。尚循無事之時乎。臣以謂。英烈果斷。非太祖太宗之道。不可
學也。比嘗有討論祖宗官制之命矣。今越兩月。未聞所正者何事。豈
以為用兵之際。未暇及之乎。殊不知用兵之道。正以此為急務耳。蓋

法祖宗以考官制。略虛文以稽實効者。用兵之本也。不務其本而欲
齊其末。臣所未聞。臣愚欲乞專委宰執。辟禮官數人。限以旬日期。於
是正庶幾法嚴事簡。如出一人。賞罰之權。不至濡滯。將使天下嘆曰。
太祖皇帝。卒復起矣。蠢爾小虜。尚足道哉。昔高宗為有商中興之主。
為之舟楫。益梅者。傳說一人而已。其言則不過曰。事不師古。臣謹說。彼
聞蓋中興之道。未有不以古先為念者。惟陛下斷之。

孝宗受禪。著作郎王十朋上疏曰。臣聞舜受堯之天下。序書者美之
曰。重華協于帝。武王繼文王而有天下。記禮者美之曰。善繼人之志。
善述人之事。說者謂堯之所為如是。而舜亦如是。故謂之協帝。文王
之所為如是。而武王亦如是。故謂之繼述。臣嘗考其行事。乃不崇堯
之時。有八元八凱者。天下謂之才子。堯不能用。至舜乃舉而用之。號
十六相。有共工驩兜伯鯀三苗者。天下謂之四凶。並在堯朝。堯不能

去至舜乃流放寬陞之。而天下咸服。文王在商之末。三分天下有其二。而終身執臣禮以事紂。至武王嗣位之初。乃會八百諸侯。與仁義之師以伐之。天下遂一統于周。舜之所以協堯。武王之所以繼文者。知斯而已矣。曷嘗泥其行事之迹哉。此堯所以得知人之明。而武王為達孝也。與恭惟太上皇帝至仁至聖。內不謀之宮闈。外不謀之卿士。斷自宸衷。以天下大器付之陛下。世皆以堯舜擬之。臣獨謂堯舜之遜固美矣。然出於堯期倦勤。豈若太上皇春秋猶盛。而遽為是曠世絕無之舉哉。真可謂賢於堯舜遠矣。陛下思所以仰副太上皇之付託者當如何。今社稷之大安危。生民之大休戚。人才之大進退。朝廷之大刑賞。非有所矯拂更張。則無以慰天下之望。必矯拂而更張之。則必有以不改父之臣。與父之政之說。而惑聖聽者。陛下於此有若難處者焉。臣謂太上皇之與陛下。可謂父堯而子舜矣。以聖繼聖。

推誠無間。豈區區形迹之所可拘。臣下常情之所能測哉。太上皇既以不疑而待陛下。陛下亦宜以不疑而報太上皇。三紀聖政。可遵而行之者非一也。至若因時救弊。有所矯拂。有所更張。宜若舜之所以協堯。武王之所以繼文者。斷然行之。以彰太上皇知子之明。以盡陛下繼述之道。毋若魯陪臣孟莊子之孝而已。則社稷幸甚。天下幸甚。淳熙七年四月。禮部尚書兼翰林學士周必大上奏曰。臣伏見玉牒所脩仁宗皇帝實元慶曆十年事迹。成書前期。告于祖宗。至日陛下御前殿而受之。事體加重如此。臣知陛下非專以纂述實歲為恭也。正欲考前規而允蹈之也。當是時。仁宗在位已二十年。而夏再盟。中國無事。方且幸龍圖天章閣。手詔輔臣。歷言時政。其大略謂公私置之。仕進多門。牧宰罕聞。奏最。將帥艱於稱職。制度未亨。簡擢靡臻。虜態難常。獻言少實。各俾條畫。用備不虞。又詔翰林學士三司使御史

中丞知開封府陳上躬之闕矣。左右之朋邪。中外險詐。縣暴虐。以至法令之未便。朝廷之幾事皆附于篇。以備采擇。又御迎陽門。召知制誥待制至臺諫官等。詢朝政得失。兵農要務。邊防備豫。將帥能否。財賦利害。錢法是非。與夫讒人害政。姦盜亂俗。及防微杜漸之策。悉對于篇。夫以光明盛大之朝。而慄慄然常若危亂在朝夕者。何也。蓋以自古人主在位既久。則怠惰或生。天下已安。則侈驕易至。故以唐太宗身履百戰。肇基王業。馬周猶告之曰。陛下必欲為久長之謀。不必遠求上古。但如貞觀初。則天下幸甚。而太宗亦自問魏徵曰。朕政事何如往年。徵旋有十漸之疏。夫太宗既而聖矣。猶待臣下隨事正救。乃克無悔。豈若吾仁宗德盛而愈謙。世治而愈畏。枚舉政要。徧詢近臣。此慶曆之盛。所以遠邁貞觀而垂裕萬年。所以遠過有唐也。故臣仰惟陛下聰明文武。本乎天縱。克勤于邦。則分陰在所惜。克儉于家。

則一毫無妄費。焚夜賢能。不間幽遠。聽用規諫。每容諫直。上畏天命。下恤民隱。凡帝王有一于此。足以致治。况陛下兼而有之乎。雖然。行健不已者。天之道也。不息則久者。人之誠也。陛下日謹一日。將二十年。仁宗慶曆維其時矣。臣願因玉牒之書。以遠繩祖武。考初元之政。而益新盛德。使馬周魏徵無以伸其喙。而貞觀事業不足進於今。則四海何患不一統。太平何患不立致。陛下留神而已。臣不勝拳拳。孝宗時。權吏部尚書韓元吉進故事曰。漢書魏相傳。相明易經。有所法。好觀漢故事。及便宜章奏。以為古今異制。方今務在奉行故事而已。數條漢興以來。國家便宜行事。及賢臣賈誼。鼂錯董仲舒等所言。奏請施行之。奏故事詔書凡二十三事。上施行其策。

臣觀相所言。可謂深達時變而知濟時之畧也。蓋一代之治。必有一代之宜。所以斟酌損益。以為子孫萬世之規。持守而勿失也。昔者三代之

盛莫如周。而周之為治。亦曰文武之政。布在方用而已。豈必遠慕前古。致望為不可及哉。宣帝之入繼大統也。號稱中興。繇得相為之輔。初無甚高難行之說。非常可喜之論。但欲奉行故事云爾。夫故事者非他。高文景武已行之善。名卿賢大夫未用之謀。吾志舉而措之天下。國家則是高文景武之治。復見於今。名卿賢大夫復生於時矣。故其策不過於憂水旱之灾。本於農而務積聚。與夫察風俗。舉賢良。平冤獄。圖師旅。而備西羌者。僅十數條。譬如良醫之論藥。未嘗廣求奇方異品。取之目前。斷斷然皆可已疾而云病。用能數十年間。常平既置。而水旱無虞。循吏既多。而郡縣咸理。任于定國之後。治獄而民自以為不冤。任趙充國之後。治邊而四夷罔不慕義。功烈巍巍。光于祖宗。其効為何如哉。逮夫元成以後。後知用儒之名。不知用儒之實。而當時所謂儒者。亦往往不習舊章。不達治體。曼引詩書。以制作禮樂。變易郊廟。為

務而經國大計。漫不加省。孝宣之業衰焉。故臣以謂若相者。真識時知變者也。

直煥章閣王師。愈上奏曰。臣聞自古言無為而治者。必稱有虞。及以書政咨岳牧。舉允甄。明四目以廣覽。達四聰以兼聽。一日萬幾。兢兢焉。業業焉。有虞之君。未嘗敢自暇自逸也。百僚師師。庶官無曠。大焉宅揆而亮采。次焉有德而載采。其或靜言庸違者。則投之遠裔。而不貸。懋哉之辭。訓戒切至。有虞之臣。亦未嘗以不事事為賢也。繇是以觀有虞之際。后克艱厥后。盡道於其上。臣克艱厥臣。効職於其下。故能自有為底。無為後世之君。臣乃慕無為之名。昧有為之實。端居穆清。息荒愒日。陳力就列。高談廢務。欲求治効。比有虞之隆。豈不惑之滋甚。恭惟真宗皇帝。以濬哲之資。撫盈成之運。克自寅畏。欲保治安。法宮之暇。肆筆成書。著勤政論。俗吏辨以示近。臣煥然之文。昭回雲

漢大哉之言。表裏六經。勤政論所以自警也。俗吏辨所以勵群工也。終能措當時於泰和雍熙之域。其與有虞之盛異世而同符。所以垂規於後昆者。顧不休哉。陛下紹復大業。適遵聖謨。日新之德。如天行健。屬精研幾。以圖天下之務。宵旰焦勞。如恐弗及。於是奉正萬邦。脩明百度。仰視真宗皇帝勤政論。可謂允蹈之矣。廓獨斷之明。操馭臣之柄。循名責實。信賞必罰。中外小大之臣。觀感而化。罔不殫心竭力。趨事赴功。成靖共匪懈之風。革苟且怠惰之習。仰視真宗皇帝俗吏辨。亦可以無愧矣。書曰。監于先王成憲。其永無愆。臣切惟陛下為然。臣抑嘗聞之人。君固欲勤於政矣。或失之叢脞。或流而為察慧。又不可以不戒。人臣固欲敏於事功矣。或邀功而生事。或作聰明而亂舊章。又不可以不察。更惟陛下留神。師愈又上奏曰。臣聞善圖治之君。凡有欲為。必遵祖宗之法度。非其

材畧。不可以大有為也。蓋念祖宗更事也詳。防患也深。其為子孫之計也遠。必熟慮周咨。俾子孫可以世守。經久而無弊。然後立為法度。皆有深意存焉。苟未至於極弊大壞。為之子孫者。未易以變更也。詩人稱武王則曰。繩其祖武。稱成王則曰。不愆不忘。率由舊章。以武王成王之德。詩人猶以此稱之。凡欲圖治之君。宜如何哉。惟我國家。藝祖皇帝開創大業。太宗皇帝混一區夏。真宗皇帝撫盈成之運。聖聖相承。重規疊矩。昭若日月之麗天。可謂盡善盡美矣。遠夫仁宗皇帝嗣服膺圖。嚴恭寅畏。慶曆間嘗出御書十三軸。凡三十五事。以示講讀。官丁度等首曰。遵祖宗訓。二曰奉真考業。三曰祖宗艱難。不設有墜。四曰真考愛民。五曰守信義。六曰不巧詐。七曰好碩學。八曰稽六藝。九曰謹言語。十曰待耆老。繼之以進靜退。求忠正。懼貴極保。勇持尚儒籍。議釋耆。重良臣。廣視聽。功無迹。戒喜怒。又繼之以明巧頑。分

希旨從民欲謹滿盈傷暴露兵革縲寡民訪屠釣臣講遠圖術辨朋
比存詔核與夫察小忠鑒迎合罪己為民損躬撫軍一善可求亦
不廢抑又其次也臣竊惟仁宗皇帝之時太平極治之功比隆三代
下視漢之文景亦由於此二十五事非徒言之寔允蹈之也陛下光
啓中興奉先思孝酌古揆今立政立事其於祖宗之法度兢兢焉惟
謹誠得仁宗皇帝之用心矣更願陛下恪守之篤行之將見慶曆之
威復見於今日狂瞽之言輒瀆天聽措躬無所

趙汝愚上奏曰臣一介疎愚昨者誤蒙聖恩令權給事中職事臣伏
觀祖宗之制凡天下事無巨細未有不經由門下省者其間事体重
大而或者施行未嘗有司自宜隨事論奏然亦有事体不至重大朝
廷視之雖若甚小而於一州一縣乃至一家利害体感為甚重者有
司往往視為細微不敢頻瀆天聽故雖心知其不可然亦電勉書讀

行下日積月累所損多矣臣嘗讀國朝要伏見元豐五年更定官

制之初詔門下省凡中書省樞密院文字應駁奏者若事体稍大入

狀論列事小即於繳狀內改正行下若事不至大雖不足論列其間

曲折難於繳狀內改正者即具進呈以應改正事送中書樞密院取

旨今三省既合而為一門下省不除侍中侍郎惟給事中掌行封駁

其權視前日為輕凡中書省樞密院文字既不得具奏進呈又不得

從而改正頗失神祖建官之意臣愚伏望聖慈依倣元豐詔書將降

睿旨今後中書省樞密院文字應駁奏者若事体稍大依舊入狀論

列外事小許具事因申中書省樞密院取旨改正庶幾大綱小紀無

不具舉亦不至頻瀆天聽又臣伏見至道九年詔書樞密院自今除

詔撰密外凡行宣命並付封駁司看詳發遣其後累聖二百餘年遵

守斯制未嘗改易始因乾道九年張說在內庭日凡所施行政令及

擬進差遣多用私意不能遵守條制深懼有司舉正其失故敢肆陳臆說。以便其私。初畫降旨揮除宣命不送門下省點勘外。餘依大觀樞密院條令施行。其機要文字更不關錄。繼又畫降指揮。今後除轉官差遣合給降告勅及事干財賦並依舊關錄外。其餘係遣機及軍政可依舊制更不關錄。緣此樞密院文字關送門下省者百無一二。蓋甚失祖宗所以建官立法本意。臣兩嘗具奏乞遵依累朝之法。特降指揮。今後樞密院文字除事干機密不關送中書門下省外。其餘並遵依大觀樞密院條令施行。經今累月未蒙頒降。臣竊惟國家法制上下相維。非惟取便於一時。正欲貽謀於萬世。今陛下聖明在上。洞見微隱。固若無甚害者。然當念祖宗憂勤立法之意。與夫後世子孫循守之計。安得不為之深思長慮也。臣蒙被大恩義當圖報。既知此事最關利害。不敢輒避繁瀆。復有奏陳。伏望聖慈。檢會臣前奏。蚤賜

旨揮施行。天下幸甚。

翰林學士承旨洪遵上奏曰。臣恭聞通者特降睿旨。令三省議設官。哀集建炎紹興以來。所下詔旨。條列以聞。恪意奉承。以對揚慈訓。臣伏讀感歎。繼以歡行。不惟仰見陛下恢洪孝治。兢兢嗣服之心。又喜太上皇帝無前之蹟。益以光明。欲致之功。將承厥志。甚盛舉也。臣竊惟太上皇帝身濟大業。紹開中興。三紀之間。厲精為理。其發號出令。所以計安元元者。丁寧欵密。至詳至厚。富哉之言。史不絕書。與天地之大德。祖宗之傳政。相為表裏。是以仁術之効。先被民物。躋于登平。然而太上皇帝未明求衣。當饋遐想。猶未永治而弗及者。豈非德意志慮已極其誠。而發諸朝廷。徧於邦國。則有司奉行之不虔。大吏原宥之未至。因循苟且。莫之訕齊。故尚煩焦勞之勤。至于今日。此風固存。未可以不察。臣願陛下申飭中外。凡大小之臣。使皆明知陛下聖

孝純至。寤寐家法。一出言。一舉足。不敢忘太上皇帝之訓。庶幾盡革
媮習。貴恭舊章。精白承休。共循堯道。以輔成陛下重華協帝之治。天
下幸甚。

光宗紹熙元年。吏部員外郎陳傅良上奏曰。臣頃蒙恩賜對。嘗奏三
劄。上陳藝祖以得民心。受天命。竊以為推行藝祖在人。未派之澤。實
在今日。誠不自意。一介僭論。偶契聖聰。獎予備至。以臣區區之愚。猶
以前說未畢。復為陛下誦之。蓋藝祖之後。天命復集於壽皇聖帝。爰
暨陛下。恭惟陛下以藝祖之子孫。而修藝祖之故事。此天意也。不識
陛下自信。足以濟此欵。抑自視過謙。而尚疑其難欵。以臣考見肇造
之業。其道甚易。知甚易行。何者。藝祖治大而不治細。任逸而不任勞。
大抵懲五代業胙之失。再立朝廷。以還君道。君道得。則朝廷正。朝廷
正。則天下理。願陛下勿疑其難也。臣請儻一二切於當今之務者。以

備采擇。以上書人文字。令知制誥看詳。升降以聞。此建隆二年十月
詔書也。以次對章。奏下尚書省參詳。可施行者以聞。此建隆三年九
月詔書也。且夫中外論建。非近臣面對。則遠臣封事。皆所以通下情
裨治道也。而其患不在於壅蔽。而在於讒嫉。今也以遠臣封事之言
付知制誥。則有舍人院任其責矣。以近臣面對之言付尚書省。則有
尚書省任其責矣。以為可聽者斯聽之。不可聽者勿聽。則聽者無持
異於衆之嫌。不見聽者無見遺於上之恨。是謂不以主斷廢群議。而
無壅蔽讒嫉之患。人主所自擇。毋過臺省長官耳。此道豈不甚易。知
甚易行哉。伏觀陛下踐祚以來。不信近習。而信外廷。不聽兩言。而聽
公論。亦既深得藝祖之意矣。然間者。上自侍從臺諫。下至百執事。或
臨遣郡國之臣。對物敷奏。多見嘉納。人人自以為得上意。且行其言。
而章往往不下。他所指揮。動亦留滯。廷臣惑焉。且陛下不信近習。不

聽游言必無壅蔽必無讒嫉或以為方崇清淨之化厭於多事而不
加者或以為陛下自去冬違豫以來聖意常有不釋然者於是務自
寬大而不敢省二者皆妄窺測也臣獨自思念未有以藝祖故事上
徹冕旒之聽者陛下其始自今凡中外論建一以建隆詔書從事不
惟若道得而朝廷正亦足以解廷臣之惑不亦美乎由此言之若法
藝祖但見其易未見其難則臣所陳推行藝祖在人未泯之澤皆非
偶然嘗試之說可以次第舉矣臣不勝至願

傳良又上奏曰臣聞今之獻計者類曰陛下宜以孝宗為法太上皇
為鑒臣切以為是說也唯孝養三宮當如此耳而非通論也何者孝
宗盛德大業不可勝紀固皆足法若夫上皇徒以積憂成疾浸不親
事不可以為宗廟社稷主而非其治皆無足法者也陛下嗣守丕圖
凡所施設誠參酌兩朝之盛典擇其為天下後世便者兼行之則可

謂集大成矣臣淺
孝宗銳意恢復馳
念中原之志枕戈
早朝晏罷寒暑不
暮夜必宣召入直
之如弗及一語契
洞達而無猜慮關
帑之積累數鉅萬
用而不用諸己此
病有以便民為請
以貪虐獲罪於民
法者非一而陛下
固不能盡識兩朝之意無以管見條上一二恭惟
於苟安雖以德壽在宥不敢北伐而追懷陵廟閔
胷膽日不違暇訓練儲峙常若臨敵此一可法也
早朝引見臣下有閱章奏日了一日勿問休暇至於
官賜坐從容議論時事此二可法也留意人才求
會立致通顯所言不酬始督過之取舍以公明白
防之意此三可法也儉於用度一金不以濫予內
唯是振荒右武無所愛惜蓋以天下之財為天下
四可法也監司帥守見辭之際各訪其處民間利
隨即施行蠲除貸宥曾無留難未嘗輒怒官吏獨
有必罰無赦此五可法也臣以為孝宗之治可為
且法此五者帝王之盛美也恭惟太上皇每事付

之外庭。采於公論。左右便嬖。絕不預政。不唯不聽其言。又禁切之。而金繒酒食之賜。則不吝。此一可法也。八廂羅事之人。置而不用。未嘗以浮言危動群臣。此二可法也。行都守臣。兩浙漕臣。三總領所。悉以士人為之。不以交結。不以誕謾。此三可法也。管軍臣僚。及沿邊帥守。不以為御前差遣。皆從三省降詔除授。此四可法也。給舍封駁臺諫。論列雖累。上進終不以言為罪。此五可法也。臣嘗謂太上皇之治。可為法者非一。而陛下宜法此五者。亦帝王之盛美也。陛下誠上稽孝宗明斷總攬之政。兼體上皇隆寬不自用之意。則天下可得而理矣。臣所謂集大成者以此。蓋舉偏而補其弊。則能全兩朝之美。矯枉而過其直。則反有一偏之患。臣恐議者不察。妄分取舍。以惑聖聰。敢昧死一言。唯赦其狂愚而采擇之。則天下幸甚。

歷代名臣奏議卷之六十九

歷代名臣奏議卷之七十

法祖

宋光宗時。軍器少監兼權侍左郎官劉光祖。上聖範劄子。曰。臣恨以虛庸待罪。丹府伏見陛下引見群臣。若內共六。各極所對。不倦聽納。臣於此時。獲望清光。雖欲竭其愚衷。補報萬一。而智慮踈短。自度無以動悟淵聽。使之收拾細故。瑣瑣條列。又非臣事君之本心。臣切惟朝廷法度。無出祖宗。太祖創業垂統。太宗守成規模深遠。成憲具在。臣嘗一二掇其故事。伏而思之。皆國家之宏圖。天下之大慮。臣謹隨事類。次分為十節。名曰兩朝聖範。首之以治兵之法。謂兵者國之大事。死生存亡之地。不可以不思也。國家二百餘年。而將才絕少。故次之以任將之道。宰相者無所不統。任社稷之憂者也。於是以祖宗選任大臣。次之。選任大臣。莫先於精擇侍從。於是以祖宗除用侍

後次之。自古賢者在位。能者在職。各有其宜。祖宗之時。兩盡其用。故又次之。以才能之任。人才之在天下。初不乏也。顧所以揀作之。選用之。為如何耳。故又次之。以取人之方。若夫愛。怕。名。器。甄別流品。祖宗所以垂法度者如此。賞不輕用。罰不苟貸。祖亦所以示勸懲者如此。過則使諫。事必先議。祖宗所以達下情者如此。是三者各為一條。至於防微杜漸。鑒前代之失。塞禍亂之原。凡祖示之為萬世慮者。臣則以是而終其說。臣仰惟陛下臨御已二十年。作盛德。故能孝。惟不息。故能勤。惟寡欲。故能儉。惟無私。故能斷。是以工人和。同朝野少事。陛下修身於九重之中。湯之日新。文王之純。亦不已也。然傳說之告高宗。必曰。念終始。典于學。厥德修罔覺。監于先王。成憲其永無愆。臣每念之。今陛下之學。至於進修之久。其心日純。其迹不見。可謂至矣。顧為治當有所法。祖宗垂範。近而易效。創守之際。思之甚精。傳誥監

于先王之言。誠當今之要務也。臣愚不佞。初無千慮之一得。可以仰裨聰明。所有兩朝聖範。謹繕寫上進。致臣憊。聖範一。

臣觀國家得天下。不以兵。而守天下。以兵。蓋其親見五代之禍。皆生於兵。建都大梁。非有四塞之固。則其勢不得不恃

兵以為守。太祖皇帝聰明聖武。未嘗以私怒殺戮一人。至於御

兵。紀律最嚴。曾不少貸。建隆元年。荆罕。與北漢戰于京土原。軍儒戰沒。太祖戮當時之不用命者。熱二。將斬其部下大校二

十九人。二年。令殿前侍衛司及諸州長史。閱所部兵。驍勇者升其籍。老弱怯懦者汰之。於是初置刺。以處逸卒。又詔釋周朝

鎮州諸縣弓箭手千四百輩。以為徒。賈。以給實。不足賴。此非身親戎行。深曉軍事。不能如此。決擇之明。三年。令搜索諸軍。上

賴不逞者。悉配海島。姦猾斂迹。是歲大。西郊。因謂近臣曰。晉

漢以來。衛士不下數十萬。然可用者極少。朕去其冗弱。又親校其擊刺騎射之藝。今悉為精銳之兵。則六祖之於兵。其簡練至矣。嘗選御馬直三十人。隸郭進麾下。與之漢接戰。進以其退怯。斬十餘人。以聞。太祖潛遣中使諭進曰。此其宿衛親近驕倨。不稟令。戮之是也。乾德三年。雄武卒於都。掠人子女。即命捕斬百餘人。京城以安。四年。親閱殿前諸軍。以藝不中選者三百餘人。悉補外職。五年。索殿前承旨不逞者二十六人。分配河東諸州。開寶四年。川班殿直搥鼓訴郊。實不得比御馬直。太祖怒。使人謂之曰。朕之所與。即為恩澤。又安有例哉。斬四十餘人。餘悉配他軍。遂廢其班。時內臣李承進。遺書于後唐。太祖因問以莊宗英武。何享國不久也。承進對以御軍之法。威令不行。賞賚無節。所獲。太祖為之撫髀而嘆曰。以茲臨之。誠為見戲也。夫太祖

豈獨於此少恩哉。竭民以養兵。恃兵以為國。而軍政不立。祇以召亂。臣嘗觀開寶末年。親征太原。諸班衛士。扣頭爭奮。願出死力。太祖曰。汝曹皆我所訓練。無不一當百。所以備肘腋。同休戚也。我寧不得太原。詎忍驅汝曹蹈必死之地乎。皆感泣再拜。然則太祖豈無故而戮人者哉。後之言兵。必以太祖為法。則其明識深計。不可以不察也。

聖範二。臣觀本朝名臣不少。而將才最乏。德業之佐。過於漢唐。爪牙之士。不及前代。雖以太祖創業之功。其將帥之可稱者。蓋無幾也。然而任將之道。則無加於太祖。何以言之。方太祖之得天下也。內之禁旅。則以太宗為殿前都虞候。以掌之。建隆二年。太宗行開封尹。太祖謂殿前衛士如虎狼者。不下萬人。非張瓊不能統制。於是始自都頭。擢瓊為殿前都虞候。乾德元年。瓊死。

以楊義為之。一日義暴疾失音。太祖幸其第賜錢二百萬。命義掌軍如故。義雖不能言。指顧之間。眾皆稟命。軍政肅然。然則太祖之知人也亦異矣。然自韓重寶罷。而殿前都指揮使譚者凡六年。乃以命義。義時為殿前都虞候十一年矣。權侍衛步軍司事。王繼勳恃恩驕恣。奪其軍職。命杜審瓊代之。審瓊卒。党進代之。其不輕於委任。蓋如此也。外之守邊。則李漢超在關南。馬仁瑒在瀛州。韓令坤在常山。賀惟忠在易州。何繼筠在州。以拒北虜。郭進守西山。武守琪守晉州。李謙溥守隰州。李繼筠守昭義。以禦北漢。趙贊屯延州。姚內斌屯慶州。董遵誨屯環州。王彥升屯原州。馮繼業屯靈武。以備西戎。或五六年。或七八年。或十餘年。以至二十年不易也。其專兵伐國。則獨得曹彬一人。以匣劍授彬。而潘美等不敢仰視。然彬之伐江南也。詳以使相為賞。

及還。則曰。汝為使相。品已極。肯復力戰耶。且徐之。更為朕取太原。因密賜錢五十萬。全彬伐蜀之後。先黜其功。既克金陵。而後語之曰。朕頃以江左未平。慮征南諸將不持紀律。故抑卿數年。為朕立法。今以克金陵還卿節鉞。其為駕馭之畧。非英主不能也。至於得將帥之助力。則如解所服真珠盤龍衣。以賜董遵誨曰。吾委遵誨方面。不以此為嫌也。為郭進治第。視親王公。主曰。郭進控扼西山。逾十年。使朕無北顧憂。我視進。豈減兒女耶。二人聞之。感極涕下。夫太祖之任用將帥。大畧如此。此其所以削平僭叛。折衝禦侮。而無安得頗牧之嘆也。

聖範三。臣觀自古興王之君。必有輔弼之臣。起而為之謀。太祖皇帝神武英畧。運天下有餘智。既受周禪。即其舊相范質等而用之。不少疑焉。蓋前古未之有也。質等練習朝廷故事。沉厚精

審。太祖初得大器。則與之共持而守之。人心不驚。天下自定。質相踰年。奏疏曰。宰相者。以舉賢為本職。以掩善為不忠。呂餘慶趙普富有時才。精通治道。每因款接。備見公忠。是宜受以台司。俾申才用。太祖嘉納其言。後二年。質等罷政。遂相趙普。於是大謀大慮。普得參之。普初以吏道聞。寡學術。太祖每勸以讀書。普由是手不釋卷。君臣之間。講學求治。汲汲如此。普獨相凡十年。沉毅果斷。以天下為己任。故太祖嘗叱雷德驤曰。鼎尚有耳。趙普吾之社稷臣也。其後凡再相太宗。一日奏疏薦張齊賢曰。防微慮遠。必資通變之才。定難扶危。宜退諂諛之輩。即令同僚共事。無非謹畏清廉。唯於獻替之時。並執謙恭之禮。稍存緘默。寧濟急須。張齊賢頃年特受聖知。升於密地。公私識者。咸謂當才。歲月未多。出為外任。向來微有傳聞。或云奏對過當。凡言大事。須有悔尤。其如義士忠臣。不顧身之利害。齊賢如當重委。必立殊功。於是太宗復召齊賢。以樞密副使。普之識慮深切。蓋知此也。當普之再相也。與呂蒙正並命。而蒙正質厚寬簡。不為黨比。遇事敢言。普甚推許之。蒙正亦凡再相太宗。太宗嘗欲選人使朔方。蒙正退以名上。太宗不許。他日又問。復以前所選對。復不許。他日又問。益急。蒙正終不肯易其人。太宗怒。投其奏於地。曰。何太執耶。必為我易之。蒙正徐對曰。臣非執。蓋陛下未諒耳。臣不欲用媚道妄隨人主意。以害國事。乃措笏俛而拾其書。徐懷之而下。太宗退謂左右曰。是翁氣量我不如。已而卒用其人。號為稱職。方是時也。太宗可謂得任相之道矣。蒙正後罷。遂相呂端。端持重識大體。方奏事時。同列多異議。太宗一日內出手札曰。自今中書事。必經呂端參酌。乃得奏聞。其後真宗之立。不為

王繼恩等所變。則端之力也。太祖宗時。宰相之任過如此。然趙
普自樞密升宰相。出入三十餘年。未嘗為其親屬求恩澤。蒙正
與端清淨寡欲。號稱賢相。當時無譏。後世不議。君臣之美。兩盡
其極。此足以為法也。

聖範四。臣嘗論國家欲宰相得其人。必自擇侍從始。左右皆正
人也。就而選焉。其得之必多。左右皆非正人也。就而選焉。其所
獲可知也已。臣觀太祖一日謂宰相曰。北門深嚴。當擇審重者
處之。范質以為清介謹厚。無若實儀者。太祖曰。禁中非此人不可。
卿當喻朕意。勉再赴職。劉溫叟為中丞者十二年。太祖難其
代。溫叟卒於官。太祖曰。必得純厚如溫叟者。乃可命也。先是有
張去華者。自訴久次。欲與知制誥張澹較其詞文之優劣。澹雖
黜而去。華自是凡十六年不遷。梁周翰頗有文辭。太祖欲用為

知制誥。周翰微聞之。遽上奏謝。太祖復薄其人。不與也。至於太
宗擢用侍從。得人最多。實備為開封府判官。面折賈琰之諛。太
宗為之不樂。而罷酒。及即位。忌備。召為樞密直學士。已而大用
之。曰。以卿嘗面折賈琰。實卿之直也。一日用李穆。呂蒙正。李至
並參知政事。張齊賢簽書樞密院事。穆等八對。太宗謂之曰。朕
為官擇人。惟恐不當。今兩制之臣十餘。皆文學適用。操履方潔。
穆居京府。尤號嚴肅。故茲獎擢。蓋推公也。當是時也。左拾遺王
化基抗疏自薦。太宗覽之。謂宰相曰。化基自結人主。誠可賞也。
因曰。李沆宋湜皆佳士。即命。中書併化基召試。並以為知制誥。
馮。嘗謂左右曰。詞臣之選。古今所重。每命一詞臣。則必咨訪宰
相。求才實兼美者。先召與語。觀其器識。然後授之。嘗詔諸王府
僚各獻所為文。閱視累日。問近臣曰。其才則見矣。其行孰優。或

以畢士安對曰。正合朕心。遂令掌制也。范杲數致書宰相求入翰林為學士。太宗惡其躁競。終不使居內職。出知濠州。而以畢士安為之。執政言張洎文學久次不在士安下。太宗曰。第德行不及耳。執政乃退。後又嘗欲召和嶠為之。已而曰。嶠眸子眊眊。胷中必不正。不可以居近侍也。其後乃使錢若水為之。寇準嘗以直史館。承詔極言社邊利害。太宗器之。謂宰相曰。朕欲擢用。準當投何官。宰相請用為開封府推官。太宗曰。此官豈所以待準耶。復請用為樞密直學士。良久曰。且使為此官可也。準尋大用。呂端自以前事秦王。又事許王。皆有罪當黜。太宗曰。朕自知卿已而亦用為樞密直學士。端尋復大用。又召向敏中於廣南。一日。御飛白書殿中。及張詠姓名付宰相曰。此二人名臣也。朕將用之。乃並以為樞密直學士。然則祖宗選用使臣。可為後法。

而太宗之際盛矣。蓋至於真宗仁宗時。宰輔多有拔擢之餘也。聖範五。臣又嘗論人才不可以一偏取。優於德行則為賢。優於才智則為能。國家兼收而並蓄之。無遺才。無廢事。然後為御之得其術也。臣觀太祖器使才能之士。皆足以鼓舞而興起之。侯陟為寬甸令。以清幹聞。即擢左拾遺知縣事。其後又命陟監本縣屯兵。未浹日。又命為淮南轉運使。周渭者為白馬縣主簿。縣大吏犯法。渭即斬之。太祖可其才。擢右贊善大夫知永濟縣。而符彥卿憚之。初下興州。渭通判州事。斬一軍校。戍卒不敢肆。太祖壯之。詔嘉獎焉。方是時也。蜀平未幾。太祖命安守忠者撫和漢中。復自漢中命為廣漢刺史。太祖每遣使。必戒之曰。安守忠在蜀。能自律已。汝見當效。其為人。又命辛仲甫權知彭州。謂之曰。蜀土始平。爾有文武才。曾是用命爾也。後將用兵於嶺南。以

王明為荆湖轉運使。王師南伐。明知廣南轉運事。嶺道險絕。兵食給足。每下郡邑。收其版籍。固守帑廩。參預軍畫。師以有功。太祖嘉之。自右補闕擢為秘書少監。領韶州刺史。其後問宰相趙普曰。儒臣中有武幹者何人。普以辛仲甫對。乃徙仲甫為西川兵馬都監。召見謂曰。汝見王明乎。朕已用為刺史。汝頗忠厚。若公勤不懈。不日亦當為牧也。因謂普曰。朕今選儒臣幹事者百餘。分治大藩。縱皆貪濁。亦未及武臣一人也。先是考功郎中段思恭嘗有功眉州。太祖召思恭赴闕。乃詔之曰。馮繼業言靈州非蕃帥主之。戎人不服。意謂非我。它人不能治也。汝能治之乎。思恭曰。謹奉詔。太祖壯之。復謂曰。唐李靖郭子儀皆出儒生。立大功。豈於我朝獨無人耶。思恭既視事。悉心撫綏。夷落安靜。罔訪利病。多有條奏。甚得吏民之情。以是觀之。太祖可謂明於知

人。善於任使矣。有李符者。知歸州。見轉運司置制有不合理者。符即上言。太祖嘉之。秩滿歸闕。即命符知京西轉運事。且書李符到處如朕親行八字以賜之。令揭於大旗以自隨。符前後條奏便宜凡百餘事。其四十八事皆施行之。復著于令。又有梁夢昇者。知德州。繩刺史以法。刺史以事告太祖。親信史珪者。圖去之。珪悉記于紙。伺便而言。太祖一日從容言。邇來中外所任皆得其人。珪遽曰。今之文臣亦不必皆善。因探囊中所記以進。曰。抵如梁夢昇。權知德州。欺蔑刺史郭貴。幾至於死。太祖曰。此必刺史所為不法。夢昇真清強吏也。取所記紙。召一黃門令齎付中書。曰。即以夢昇為贊善大夫。既行。又召還。曰。與左贊善大夫。仍知德州。而珪乃不敢言。范質之子。是先知邕州。甚有治効。其後太祖令管當淮南諸州。并淮北徐海沂等州。水陸計度轉運

公事。謂是曰。朕委卿以方面。凡除去民隱。漕輦軍儲。悉許便宜。從事不用一一中覆也。許仲宣亦太祖時所用者也。至太宗時。王師征交州。周渭仲宣並為轉運使。有敗卒奔還。掠民財物。渭捕而戮之。後至者悉令解甲以入。而仲宣便宜班師。不俟報。詔嘉獎之。凡太宗之委用能臣。悉本太祖用范旻知兩浙諸州。以李符知開封府。以辛仲甫知益州。當是時也。陳恕奏三司姦弊。即擢恕與侯陟王明同判三司。則太宗之所用多太祖之人也。又有如李維清者。王濟者。任中正者。皆公平辦職。而柳開等以文臣知兵。換秩赴功。夫祖宗之用人如此。率皆精強幹治。忠實不欺。蓋非儉巧之徒。行險而僥倖。是以事立而民安也。

聖範六 臣嘗伏思天下之事變無窮。而人才為有限。每不足以給天下無窮之事變。此古今之所通患也。然而嚴為之法。不若

廓為之途。譬之水焉。壅則腐敗。決則踈達。臣觀太祖皇帝建隆三年。詔翰林學士文班常參官。曾任幕職州縣者。各舉堪為賓佐令錄一人。聽其內舉。而坐以失舉之罪。乾德二年。又詔制舉三科。不限內外職官。前資見任。布衣黃衣。並許直詣闕門。聽其自薦。是歲。又詔吏部南曹。自今常調赴集選人。取其歷任有課績無闕失。而其人才可副升擢者。具名送中書門下。引驗以聞。量才甄獎。蓋太祖慮失銓衡之職。止憑資歷。而英俊或沉於下僚。故也。五年。又詔諸道節度使。留後。觀察使。各舉部內才職優長。德行尤異者二人。防禦團練刺史。各舉一人。當是時也。太祖親試取士。抑權貴之僥倖。開孤平之進取。是以太宗即位之始。思欲廣振淹滯。則謂侍臣曰。朕欲博求俊乂。於科場中。若輩望拔十得五。止得一二。亦可為致治之具矣。於是進士得呂蒙正

以下一百九人。而甲乙之科悉為監郡。宰相言取人太多。用人太驟。而太宗不之進也。蒙正等辭。又特召令升殿諭之曰。到治兩事。有不便於民者。疾置以聞。由此觀之。祖宗創守之初。思得多士。布列中外。其選拔蓋如此也。其後太宗或詔使臣或詔監司。或詔州牧。或詔四品。或詔五品。各令舉人。嘗謂宰相曰。國家選才最為切務。人君深居九重。何由編識。必須採訪。苟稱善者多。即是操履無玷。若擇得一好人。為益無限。嘗詔李昉楊徽之等十一人舉三司判官。及轉運使各一人。又詔蘇易簡陳恕魏庠寇準趙昌言等各舉堪任京官二人。又詔左司諫呂文仲等九十七人。各舉五千戶以上縣令二人。當是時。民務豐庶。天下少事。太宗聽政之暇。悉委兩省兩制清望官名籍。閱朝士有德望者。悉令舉官。他日又用呂蒙正等曰。求賢之要。莫若責之舉

主。因詔蒙正以下至知制誥。各舉有器業可任以事者一人。他日有司奏諸州闕官五十餘員。又詔尚書左丞李至等八十四人舉廉恪有吏幹者各一人補之。因謂宰相曰。卿等職在掄才。今令朝臣舉官。已為逐末。苟更不擇舉主。何以得人。至哉斯言。可謂得取人之要矣。王禹偁羅處約皆梁南一縣令耳。聞其名。並召而試之。擢為直史館。錢若水同州推官耳。聞其事。亦召而試之。又擢為直史館。夫太宗之選用庶僚也。皆引對而觀之。時加超擢焉。然又慮其矯節冒進也。則復送中書門下考其履歷。而進退之。故嘗與呂蒙正言曰。治世無事。人才難知。蒙正對曰。送試事任。則能否洞分。人之善惡。終不能掩。久則彌著。苟暫聞善惡。或涉愛憎。恐誤任使。故必久而察之。則賞罰無濫。太宗善之。以是而觀。則當時羅網天下之士。取之若易。而試之則精。夫

太宗之作人。非特為一時之用也。自是皆砥礪洗滌彬彬輩出矣。

聖範七。臣聞名器不可以妄假。而流品不可以私徇。毋為之漸。其勢將長。毋為之基。其事將成。是以祖宗於紀綱法度維持之際。不敢少壞其隄防者。所以為後世慮也。臣觀太祖皇帝開寶中。詔流外選人。經十考當入令錄者。必引對。乃得注擬。至於驅使散官伎術之流。資考雖多。不在注擬之限。其後教坊使衛德仁以老請外官。援同光故事求領郡。太祖曰。用伶人為刺史。此莊宗失政。可劾之耶。宰相擬上州司馬。太祖曰。上佐乃士人。所處資望甚優。亦不可輕授此輩。但當於樂部遷轉耳。太祖一言。而世守以為法。太宗皇帝時。有陳舜封者。父為伶官。以罪黜流。後舜封舉進士及第。為縣主簿。轉運使言其通習法律。宰相以

廷評授之。因奏事。言辭捷給。舉止類俳優。太宗問誰之子也。舜封自言其父。太宗曰。此真雜類。豈得任清望官。蓋宰相不為國家澄汰流品。於是遂以為殿直也。先是中書吏有以舉學究及第者。已而太宗知之。命追奪所授勅牒。勒歸本局。謂侍臣曰。科級之設。待士流也。豈容吏冒進。因下詔禁絕之。至道二年。中外官以郊祀當進秩。有白州刺史錢昱者。始自吳越歸朝。自陳嘗習文藝。求改秩。除祕書監。後遷工部侍郎。已而連試都無善政。至是太宗謂宰相曰。錢昱貴家子。無檢束。不宜任丞郎。乃以為鄧州團練使。於是宰臣等言。覃慶推恩。南北省及憲官。不可以它官循資遷授。惟登進士第。有文學者可膺是選也。又詔伎術官見任京官者。自今遇慶澤。但加勳階。不得擬常參官。而諸科登第者。所選官亦不得與進士比。其嚴如此。初五品以上官

任子皆攝太祝。太宗謂宰相曰：膏粱之族，子孫任者多至四五人。而覃慶之際，中書又皆授以攝官。未幾，即補正員，不下數年，遂通朝籍。此其弊政亟宜革之。詔自今止賜同學究出身，準法選集。當是時也，國家甚強，中外和樂，優恩濫秩，未甚有害。而太宗聰明，守太祖之遺意，君臣之間，講求裁節，不以天下之私情，輕壞國家之公器。然則朝廷之上，所宜推此類以行之。塞僥倖之門，開公正之路，而誰敢不聽也。

聖範八。臣嘗論人臣食君之祿，任君之事，因事而有勞，則人臣所當然之分也。食君之祿，任君之事，因事而有罪，則所不當然之分也。分之所當然，何賞之可幸？分之所不當然，何罰之可貸？臣觀祖宗之用賞罰也，非可勸之功則不賞，非可議之罪則不貸。臣嘗攷之，建隆二年，導閔水與蔡水合貫京師。南歷陳穎，達

壽春，以通淮右。命右領軍衛上將軍陳承昭督丁夫數萬以治之。浚五丈渠，自都城北歷曹濟及郛，以通東方之漕。命給事中劉載督丁夫三萬以治之。又命陳承昭於京城之西，夾汴河造斗門，自滎陽鑿渠百餘里，引京索二水，架流于汴。東匯于五丈河，以便東北漕運。此三役者，史不書其賞也。後數月，又命承昭塞滑汰河，役成，賜錢三十萬，不聞賞其官也。乾德元年，又命承昭鑿池於朱明門外，引蔡水注之，造樓船百艘，以習水戰。二年，又命承昭鑿渠自長社引淇水至京，合閔河。閔河之漕益通。四年，河決滑州，詔殿前都指揮使韓重斌、馬步軍都頭王達、又等督士卒丁夫數萬人治之。開寶元年，增修京城，又詔王達又護其役。凡此數役者，史不書其賞也。是歲，大內營繕俱畢，亦不書其賞也。五年，河大決澶州，發諸州兵及丁夫凡五萬人塞之。

命州團練使曹翰往督其事。未幾，河所決皆塞，亦不書其賞也。太祖時，征伐諸國，兵器精甚。後世莫及也。當是時，獨垂一魏丕掌之。自初即位，授丕作坊副使。丕在職甚盡力。居八年，始遷正使。至開寶末，仍典作坊。而始以丕領代州刺史也。然則太祖時，人臣盡瘁事功如此，而賞不可妄得，非太祖寡恩也。人臣分之所當然，而一一賞之，則人心惟有幸賞耳。將皆以奔競得之，而賞不足以勸矣。至其用罰也，臣又嘗考之。建隆二年，內酒坊火工徒突入三司。太祖怒，以酒坊使左承規副使田慶岩縱其下為盜，並禁市。館陶民訴括田不實，本縣令程迪決杖流海島，而給事中常準括田使也，奪兩官免之。謫本縣令李瑤以括田受賕，而右贊善大夫申文緯受詔按田不之察，瑤杖死。文緯除籍為民也。三年，右衛率府率薛勳掌常盈倉，受民租槩量重，詔

免勳官，流徙之。當是時也，在官犯賕者，雖去官已久，而事覺猶坐。非太祖深於用法也。人臣分之所不當然，而一一賞之，則人心惟有幸免耳。將皆貪暴殘民而罰不足以懲矣。在太宗時，其用賞罰也亦然。淳化元年，採訪使言知白州蔣元振清苦勵節，民便其政，秩滿，遮轉運使乞留，凡七八年不得代。太宗嘉嘆久之，詔賜元振絹三十匹，米五十石而已。又言知頰城縣姚益恭，不施鞭朴，境內大治，民數千人。三遮轉運使乞留，惟恐其去，亦賜絹三十匹，粟二十石耳。當是時，以勞增秩者鮮矣。至殿直李諤坐監牧許州，盜官菽一百五十石，馬死者千五百足，則擢遷闕下。并內侍梁守忠及主吏三人，悉斬于市。太宗之懲賊吏也，未嘗少貸。少府監請配役人郭冕等九輩，皆任京朝官，會赦當敘。太宗曰：冕等賊吏，不可復任。因仕籍止，令釋遣之。吏部選人以

郊赦免選。悉集京師。太宗曰。並放選。則負罪者幸矣。無罪者何以旌勸。乃令經停殿之官。守常選也。夫太祖太宗。以賞功罰罪。為政令之紀綱。是以賞行而人知勸。罰行而人知懼。雖其後累聖相承。率本忠厚。然而賞必加有功。罰不失有罪。雖重輕不同。而其歸一也。

聖範九。臣聞天子者。當以天下之目視。以天下之耳聽。以天下之口使言。以天下之心使思。然後利害畢達。休戚畢陳。善善惡惡。是非非非。然後可以不亂。太祖皇帝神聖豁達。不自掩蓋。初詔五日內。殿起居百官。以次轉對。並須指陳時政得失。朝廷急務。或刑獄冤濫。百姓疾苦。咸許來訪。以聞。仍須直言其事。不在廣有牽引。或事關急切。則許非時詣閣上章。此建隆三年詔也。乾德四年。又詔曰。國家選用時才。參掌邦計。貨泉所聚。職任尤

繁。所冀得人。俾各陳力。雖思不出位。勿侵官局之權。而知無不為。共濟公家之務。或綱條有所未正。利害有所未明。正期開善。以相規。安可不言。而自守。自今三司使所行事。或未當。本判官並應執諮。所執理明。而三司使不從。則許面奏。或事有已經敷奏。獲旨施行。而未通便。亦許指陳。若本判官避事不言。許它部判官及逐路轉運使。直具利害聞奏。其或因而更改。頗協便益。並充課績。若明知利害。循嘿不言。則屬罰隨之。由是觀之。太祖皇帝時。直言得失。不為訕上。明辨是非。不為侵官。所以盡事理。而究下情也。至太宗皇帝在位。田錫以進諫為己任。太宗以納諫為盛德。方錫為盧多遜所不悅。出為河汴南路轉運副使也。因入辭。進封事。論軍國要機者一。朝廷大体者四。太宗賜詔答之。且云。自今有所見聞。無辭獻替。其後復自相州上疏言方今

筦權貨財。網利太密。躬親撥務。綸旨稍煩。復有未喻聖意之事。三。奏請可行之事。二。其後又自睦州上疏曰。近陛下有朝令夕改之事。由制敕初行。時有未實。而無人封駁者。給事中之過也。陛下有捨近謀遠之事。由言動所為未合至理。而無人敢諫諍者。是左右拾遺補闕之過也。又曰。加以時久升平。天下混一。致陛下謂升平自得。資陛下以功業自多。日遷月移。浸成聖性。左取右奉。無非睿謀。又曰。臣下言之。則謂之封章。陛下行之。則出為法令。法令可簡。而不可使繁。制度可久而不可屢變。變易不定。是彰思慮之不精。繁多難依。是令手足之無措。其後入為知制誥。復奏疏論邊事曰。今之禦戎。無先於選將帥。既得將帥。請委任責成。不必降以陣圖。不須授之方略。又曰。前年出師。命曹彬以下。欲取幽州。是糜利用。質令圖之。葦蕩悞。聖聰陳畫。謀策

而宰臣昉等不知。去年招致義軍。調配軍分。宰相普等亦不知之。豈有議邊陲發師旅。而宰相不預聞。今宰臣普三入中書。再出藩鎮。人所具瞻。事無不歷。乞陛下以軍旅之事。機密之謀。悉與籌量。盡其機畫。此乃國家大體。君父至公。又曰。以臣所見。小公事。不勞陛下。一一用心。若以社稷之大計。為子孫之遠圖。則在乎舉大略。求將相。發帝王之大體也。錫前後所陳深切。載在史冊。足以彰太宗受言之美。方是時也。太宗以補闕拾遺。時多循嘿。失建官本意。於是改為左右司諫。左右正言。俾職業之是修。期名實之相副。其後右正言謝泌。數奏章論時政得失。太宗嘉其忠盡。擢左司諫。賜金紫并錢三十萬。泌一日得對便殿。復面加賞激。泌謝曰。陛下從諫如流。故臣得竭誠。昔唐末有孟昭圖者。朝上諫疏。暮不知所在。前代如此。安得不亂。太宗動容

久之。夫祖宗聖德。豈羣臣之敢窺。而其樂受忠諫。無一善之不錄。然則舍己從人。固堯舜之所以為大也。

聖範十。臣嘗謂自古禍亂之萌有三。而宗社之本有一。強臣擅兵。外戚預政。中常侍用事。三者皆前古禍亂之萌也。付託神器。厚重而深固。一者宗社之本也。祖宗時。窒其萌而培其本。臣請得歷言之。太祖皇帝既誅李筠等。一日召趙普問曰。天下自唐季以來。數十年間。帝王凡易八姓。戰鬪不息。生民塗地。其故何也。吾欲息天下之兵。為國家長久計。其道何如。普曰。陛下之言及此。天地人神之福也。此非它故。方鎮太重。君弱臣強而已。今所以治之。無他奇巧。惟稍奪其權。制其錢穀。收其精兵。則天下自安矣。時石守信王審琦等皆太祖故人。各典禁衛。普乘間數言之。請授以它職。太祖曰。彼等必不吾叛。卿何憂。普曰。臣亦不

憂其叛也。然燕觀教人者。皆非統御才。恐不能制服其下。苟不能制服其下。則軍伍間。萬一有作亂者。彼臨時亦不得自由耳。太祖悟。於是召石守信等飲酒。酣喻以安危禍福之理。明日皆請疾請罷。於是乃漸消藩方之權。收其精兵。聚之京師。國家二百餘年無強臣擅兵之禍者。由制之得其道故也。杜太后聰明有智度。每與太祖參決大政。杜審瓊太后之兄也。與其弟審肇審進家于常山。太后無恙時。審瓊嘗入見。置酒萬歲殿上。太祖與太宗以元舅故。皆捧觴列拜稱壽。其尊禮不過如此而已。昭憲升祔且一年。始悉召赴闕。皆命為大將軍。然並致仕。賜第京師。其後特命審瓊代王繼勳軍職耳。未嘗及以政也。國家二百餘年無外戚預政之禍者。亦由制之得其道故也。太祖時左右內臣。不過五十餘員。止令掌宮掖中事。或不得已。將命而出。止令

幹一事。不得妄採聽他事。奏陳。又詔年三十以上。聽養一子。所以裁之者至矣。至太宗時。王繼恩以平賊之功。中書議欲以為宣徽使。太宗曰。朕讀前代史書多矣。不欲令宦官干預政事。宣徽使。執政之漸也。止可授以他官。宰相懇言。繼恩功大。非此不足以賞。太宗怒。深責宰相。因別建宣政使名。以授之。先是通進銀臺司。隸樞密院。凡內外覆奏文字。必關二司。然後奏御。外則內官及樞密吏掌之。內則尚書內省籍其數。以下有司。或行或否。莫得而糾察也。太宗始詔宣徽。杜院廳事。為通進銀臺司。命向敏中張詠同知二司公事。然則祖宗之良法美意。所以杜中常侍用事之漸。又如此也。三者皆自古禍亂之萌。而太祖太宗深思遠慮。達塞其原。至於付託神器。厚重而深固。又足為萬世之法。且太祖藏誓書於金匱之事。非漢唐之君所能及也。至於

太宗初置皇子侍讀。其後又為諸王及皇子府。初置諮議。誦善侍講等官。以王適姚坦邢昺等十人為之。嘗謂宰相曰。近有人上章言及儲貳者。國家宗祀。豈不在心。朕於諸子。常加訓勸。今寮屬悉擇良善之士。至於典臺皂隸之輩。並朕親選。不欲令姦儉佞人在左右。更待三五年後。各漸成長。朕於處馭。必使得宜也。其後以壽王為皇太子。喬維嶽楊礪為諭德。楊徽之舉士安為庶子。李至李沆為賓客。賓客見太子如師傅之儀。太子見必先拜。動皆諮詢焉。京師之人見太子者。皆喜躍曰。真社稷之主也。夫祖宗知天下之本在此。察天下之禍在彼。是以防微杜漸。深計而極慮之也。

蔡戡上奏曰。臣聞堯傳之舜。舜傳之禹。皆曰。允執厥中。書贊舜曰。重華協于帝。贊禹亦曰。祗承于帝。堯舜之所傳。舜禹之所承。莫非一道。

故堯舜為五帝之成帝。大禹為三王之顯王。後聖有作。不可企及。恭惟高宗皇帝。茂建中興。勤勞三紀。親以天下授之壽皇聖帝。壽皇嗣守丕基。勵精二十有七年。親以天下傳之陛下。陛下父子相繼。揖遜相承。又非堯舜禹所能比擬。亘古未有。可謂盛矣。三聖授受之際。心傳之妙。愚臣不可得而聞。竊讀隆興詔書有曰。凡今日發政施仁之目。皆得之問安視膳之餘。乃知壽皇動以高宗為法。然則壽皇之治。又陛下之所當取法也。壽皇誠心愛民。出於懇惻。凡有水旱。尤軫聖懷。如揀焚拯溺。唯恐或後。不吝倉廩府庫。以賑濟之。勤卹民隱。視之如傷。此壽皇之仁也。壽皇奉事北宮。孝敬曲盡。朝以五日。歲時躬率百寮。親奉玉卮。上千萬壽。以侈大慶。自奉甚薄。極天下以為養。猶懼不至。此壽皇之孝也。壽皇勵精為治。每日視朝。未嘗暫廢。親覽章牘。朝奏夕報。不時宣召儒臣。講論經理。詢訪治道。此壽皇之勤也。壽皇

以儉約先天下。在位日久。宮至苑囿。無所增益。飲膳服御。悉從裁損。知天下之賦租。乃生民之膏血。未嘗妄費濫予。此壽皇之儉也。壽皇遴選將帥。分任邊閫。講明軍政。簡練師徒。蜀道地最重。去朝廷最遠。尤切西顧。曩嘗闕師。亟命大臣鎮撫之。責以近期。星馳而往。所以修武備。重邊寄者如此。壽皇待過臣鄰。燕陟有序。進退有禮。縱有顯惡。必待人言。洊至。然後譴責。與眾共之。示天下以至公。所以勸臣下勵風節者如此。壽皇獎借言者。導之使諫。其人未必皆賢。所言未必皆是。壽皇不憚舍己而從之。所以廣言路。振紀綱者如此。壽皇愛惜名器。不以假人。凡有除授。未合公論。給舍繳駁。無不聽從。所以吝爵賞。抑僥倖者如此。壽皇聖政。載之簡牘。播之天下。不可具舉。此數者其大要也。臣願陛下深念壽皇付託之重。凡事親修身。立政用人。一以壽皇為法。則三聖之治。如出一轍。傳之無窮。施之罔極。於舜禹有光。

矣。實惟宗社無疆之休。天下幸甚。

哉。又上奏曰。臣聞事有見於載籍者。不若傳聞之詳。得於傳聞者。不若親見之審。祖宗之政。布在國史。班班可考。然未若孝宗之治。陛下之所親見。孝宗聖政。天下能誦之。難以悉舉。凡事親修身立政用人。皆可為萬世子孫家法。陛下嗣守丕基。遵奉成憲。罔敢墜失。孝宗所以貽厥孫謀。陛下所以繩其祖武者。可謂兩得之矣。太上皇帝在位未久。率循舊章。然高世之行有二。自古甚盛德之主。鮮能及之。太上取下以嚴。未嘗假以詞色。凡有小過。必加譴逐。人人重足而立。不敢撓法干政。紀綱整肅。中外清明。此太上之義德也。太上聖度包荒容受直諫。雖犯顏逆指。自敵已以下。不能堪者。太上怡然受之。不以為忤。未嘗罪一言者。此太上之容德也。二者可為法於萬世。抑又陛下之所親見。臣願陛下動法孝宗。至如太上皇帝取納諫之美。尤當

守而勿失。則三聖之治。如出一轍。傳之無窮。施之罔極。於祖宗有光矣。實惟宗社無疆之休。

元世祖時。趙天麟上策曰。臣聞繩祖武以受天祐者。武王之繼於文也。兼三王以施四事者。公旦之忠於周也。高宗之命傳說曰。迪我高后。以康兆民。仲尼告之曾子曰。無念爾祖。聿修厥德。何祖宗之皆可法。而子孫之不敢忘哉。蓋祖宗所以立業。子孫所以守成。立業者須備於三理四維。守成者亦須於三理四維。故也。夫道不足以御天下之衆。豈能得天下哉。德不足以一天下之心。豈能服天下哉。仁不足以博天下之施。豈能安天下哉。志於道。據於德。依於仁。此之謂三理。然後行之以乾健。柔之以坤順。鼓之以震勇。和之以咸感。此之謂四維。理以理之。維以維之。乃能立萬世子孫帝王之業也。或者以平亂右武。持盈文。攻守非一途。動盪有萬變。執陳亦以調政者。猶膠柱

而調絃。拘獲章而求治者。如刻舟而求劍。將致絃不可調。劍不可求。而勞心無益也。臣竊以為不然。臣之所言者理也。彼之所知者事也。自萬事之殊而歸乎一理之同。豈有不合者哉。我聖朝太祖之立業也。英雄入彀。俊乂圖功。駕福氣以長驅。燦天光而下照。強梁之子。棄氣吞聲。悖逆之徒。糜軀碎首。禮以定慶。賞義以制。刑罰慶賞以厲功。能。刑罰以加非辟。上順天時。下協人欲。凡此皆志於道也。金行既墜。水運方來。冠一家天子之先王。應四海人民之嘉會。風塵未息。雨露常濡。已服者返舊業而安居。未服者不得已而致討。凡此皆據於德也。袖携三尺。力拯群生。奮遐方沙漠之龍庭。居歷世帝王之封域。雖未暇並嚴其禮樂。然莫非暗運於權衡。貽厥孫謀。而稽天若。凡此皆依於仁也。而又不遑落居。居嘗戒飭。握乾符而大有。總師衆以同人。翼翼夔夔。兢兢戰戰。豈非健乎。達宜處事。捨己從人。不先事以啓後。


悔之門。不後時以虧先見之哲。豈非順乎。果於濟世。信於立言。符契有結繩之淳風。戈甲有無敵之利用。豈非勇乎。恩波旁溢。化日高明。方其道行也。聖心開江北之區。及祚盛也。神孫定江南之地。七八九六。無思不服。億兆三千。惟時各遂。豈非感乎。伏望陛下。求言孝思。孝思維則。保太平之廣業。覽聖祖之宏規。布于方維。宣昭令典。頒諸史館。庸播皇風。移向時平亂之端。為今日守成之具。以極天下之望。以盡陛下之孝。不亦可乎。道以修身。德以御世。仁以撫民。健以遷善。順以理性。勇以改過。咸以結人。三理理乎內。四維維乎外。宗廟常享其祭。陛下常奉其祀。卿士常守其職。小民常託其庇。非但通達孝壽。亦所以垂裕後昆也。

仁宗皇慶元年。翰林學士承旨劉敏中上奏曰。臣某等言。蓋聞人臣以報國為忠。效忠以進言為先。况臣等以衰暮之年。遭逢聖運。首膺

寵召過荷。德惠不有一言。將何以報。竊惟天育萬物。不能自理。付之天子。天子理萬物。不能獨為。付之中書。中書所以行天子之令。而裁理萬物者也。其事權不可不專。猶慮有缺焉。於是置御史臺。執憲以繩之。繩之者。所以成之也。其紀綱不可不振。苟中書之事權不分。憲臺之紀綱不沮。天下無難事矣。故聖王無為。無為者。得其要也。其要奈何。省臺是已。臣等前陳八事。既嘗言之矣。欽惟皇帝陛下。聰明知睿。出于生知。寬仁慈愛。發乎至性。爰自潛邸。至踐東闈。專剪巨蠹。一匡宗社。其規摹注措。固已有在矣。即位之日。遵述世祖皇帝成憲。頒降明詔。播告天下。丁寧切至。聞者感動。其於利民去弊之道。至矣盡矣。至謂除樞密院。御史臺。徽政院。宣政院。各依舊制。其餘諸衙門。及近侍人等。敢有擅自奏啓。中書政務者。以違制論。又至元三十年已後。諸衙門改陞。物設并多。餘負數。非世祖皇帝之制者。從省臺分揀減併降罷。詳此二條。聖意之所以假權中書。畀重憲臺者。昭然可見。何者。急於圖治耳。是以中外拭目。欣觀太平。然臣等愚謬過計。猶有不得不冒罪為陛下言者。夫欲得而患失。與喜而奪。慈人情之所同也。今當分揀減降之始。其患失而悲奪者。為不少矣。慮或萋斐之言。伺便而入。浸潤膚受。譖歸省臺。倘省臺一搖。政本隨易。必至上煩聖慮。下紊諸司。在於遠圖。所繫甚大。伏願陛下。弘乾坤之量。廓日月之明。謹更始之方。守已頒之制。提綱挈要。確然不移。使微漸之萌。密過潛弭。如此事權自一。紀綱自振。庶政萬幾。不勞而理。陛下雍容高拱。坐撫至治。享萬斯年。無為之樂。臣等之願也。干冒天威。不勝恐懼。

Blank page with a large dark stain on the left side and some faint marks at the bottom.

Blank page with vertical ruling lines and a small mark on the right side.



程子